

JESUCRISTO NIQUITISHANO JUAN

Jesucristo niquitishano pajaniyara

¹ Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishi-tiniuria na tojitiajaca, taa quiari naataja Pueyaso miiniu-tianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijia miishaanutaniyani. ² Janiyari puetunu na niquitishanojuanaa caminiujiya niajaniya seetanujua-naani. Niocuajaari seetanujuaanaa Pueyaso rupaa, Jesu-cristojiniji cua caminiujiushano niaara.

³ Shuquiriaatia quijia cutaraari noo pojori, canapute nio cua caminiujiushano Pueyasojinijini serojonutaniya Pueyaso pueya maapue niquiarani. Na tojitiajacaari shuquiriaatia quijia quiniutianiyajuhuj, nojori tiuuni-uucua nio naajiojinia cua pohuatasanoocua. Nio pohu-atasano tohuateenuraari tari catecanoya.

Juan naajiosano siete Pueyaso pueya maapuecuara

⁴ Janiyari Juanni. Asia jiyajinia quiniaa siete Pueyaso pueya maapuecuara naajiyanjia. Pueyaso cuaara cumaquiiria niajaniya, cuaara nioojia cajitiirijuhuj. Pocua niriqiano pa Que Pueyasoori jiyanhua maninia. Nojuajaari pueyaracaanu quijiacuja. Quiarjia quiyajaar-ihuj. Na Sohuanuuri juhua siete saminio casaa niquis-hano, puetunu tiqiyocuajanaa quijia na quiniuucua. Nojoriiri Pueyaso cajishaqui tacoji quituuya. ⁵ Pueyaso Niyanu Jesucristoori seetanujuaanaa puera caminiujiu-nia puetunu na Que Pueyaso Rupaajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyaniijianu-cujanaa Jiyaniijia. Nojuacuajaari pa panijia. Tama

na nanacajaaja shootequiaariiri sesa pa miiniujiniji na jayonura pajaniya, tojetaarucuajanaa sesa miyashijiacara na jataniniuria pajaniya. ⁶ Nojuajaari pa jiyatequiaari jiyaniijianucua pa quiniuria, na Que Pueyaso secojonaa pa quiniuria pueyacuara, nojuaja pa shuquiritianurajuhuj. ¡Pa Jiyaniijaari jiyanohua maninia! ¡Pa Jiyaniija cuara shuquiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiiriatej.

⁷ ¡Nia maure! ¡Pa Jiyaniija Cristoori cohuajajinia tari cunocojiuhua! Puetunu pueyajanaari na niquiniutianiya, noo pojorijihuj, na motenaatej. Puetunu mijiria quijiaca pueyapuejanaari nocuaji nujuquenutaniya nojori martenuta. Taaquiririnij. Naa quiniutianiyacuaaquiniateja na tiuquishacariuhua.

⁸ Pa Jiyaniija Pueyasoori tama nojuajiniijiaaja sequeya: “Janiyacuajaari puetunu casaajanaa coteetanani, na shaajariquianojuhuaj. Puetunu cumaacaracajanaanijia. Janiyacuajaari pueyaracaanu quiijiani. Majaari cua supueni quiquiaari. Janiyari niaacua tiuquiriquianohuani”.

Juan niquishacari Cristo puereeta na shacantuuca cumacajinia quiyano

⁹ Janiyari niarta Pueyaso pueyano Juanni. Pa Jiyaniija Jesucua tiuujia cua quiniuucujuhuj, janiyari jaaraaja niaata cojiritiashiya naquiya miiniuni. Naaratej, paari mariyata jiyaniijianucua jiyatesocoriquianoni. Cunora, paari juhuajaniya naquiya miiniu rejeretaquiaani Jesucristo cumaquishacari pajaniya. Pueyaso rupaa Jesucristojiniji cua poojotanuucua, janiyari shoniniacu caminia jiuujiajinia jatasano quiyani jiya tucuaatiajaacua. Nio jiya tucuaatiaja sesaari Patmos. ¹⁰ Tamonu juuca, pa Jiyaniija samiitianuhua pa niishiniu juucani, Pueyaso Sohuanuuri cucua niquianu jiyanohua na cumaacata.

Janiyari jiyacari rupaa tojirii nacaano cua nijiniarani, juhua trompeta jonenenu. ¹¹ Cua sequeriquiaari:

—Casaa cua niqitiniutianiya quiajaniyani, cuno quia naajiotare nequesoretuneerano. Quiocua na nuhuaji na jiyarore Asia jiyajinia nio siete cua saquiriojosano pueya maapueecua. Nojoriiri Éfeso tiacajinia quiniaa, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

¹² Janiyari cua nijiniara tacatequeeni cua niqiniuria cante cucua pocuariquiaani. Cua tacatesacari, janiyari siete samari nujuatacojua niqiriini, orojiniji shipinijosano. ¹³ Cuno samari nujuatacojua tajiniani, janiyari pueyano niqiriini, juhua Pueyaso Niyanu niqishano. Tucuaque toque cushiriquiaari. Na niohuacaacuma puecariquiaari. Na jiriquiajinia camarucuteriquiaa orojiniji shipinishano casaari. ¹⁴ Pueyaracaanu quijia na quiniuucua, na muecacaari tojetaarucuajanaa jiyanoehua cohujaja quiriqiaa juhua sohuanatuu. Maatia pueya jiuujia niqijia na quiniuucua, na namijiaari juhua mani rimianacuriqiaa. ¹⁵ Na niohuacaari nenecuariqiaa juhua jiyanoehua naseeca casaajinia mohuaquishano bronche. Naa shacantuuca niqishano quiriqiaari puetunu sesa casaajanaa paracaajia na quiniuucua. Cumaacaraca Jiyaniijia na quiniuucua, na pocuasacari, jiyanoehua tojishaariquiaari juhua sararojua, jiyocuaanuji mohuaca tija. ¹⁶ Na miaquetajata siete riya muetujuriquiaari. Naajuhuj, nijiniaquetucuaja mueruuri na rupaamaji mueranacuriqiaa, na rupaa ruuretajaca na puecoonura. Na jiquiocoori jiyanoehua shacantuuca quiriqiaa juhua jiyanoehua pananu jasacari panacari.

¹⁷ Cua niqishacari nojuaja, janiyari cua puerenuta na pajama pojyaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa coteetejani, na shaajariquianojuhuaj. ¹⁸ Janiyari pueyaracaanu quiijani. Macu quiquiaarinijia. Naajaa, janiyari samiitiaquiaariuhuani pueyaracaanu saminio cua quiniuria. Janiyari macunucua quiquio riatataja camaruni. Naacuajitij, janiyari cumaacaracani cua tojiyashijiaca cua quejoonura macunucua quiquiojinia. ¹⁹ Pueya niishishocoriquiano, quia niquishano quia naajiotare Juannaa, taa na quiyacuajani, naajuhuj taa mijiria quijiaca miishaanutaniya na nuhuajini. ²⁰ Quiarjia quia pohuatারেera maatia quia niishiniuria cua niquitishano quiajaniya. Cuno siete riya quia niquishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jiitanaa. Cuno siete samari nujuatacojua orojiniji shipinijosano quia niquishanojaniuhuaj, cunoori siete cua saquiriojosano pueya maapue.

2

Éfeso tiacajinia quiniaa Pueyaso pueya maanuucuaa naajione

¹ Juhuacatecara naa cua sequereeri:

—Éfeso tiacajinia quiija cua seruucuaa quia naajiore, Pueyaso pueya maanu jiitianani. Naa quia sequere nojuaja: “Nojuaja, cante siete riya cacaa na miaquetajatacuajani, cante siete samaritiu nujuatacojua tajinia rucuanefojuacuajani, nojuajaari naa quia sequeya: ² ‘Janiyari puetunu quia miishanojuanaa niishiyani. Quiaari jiyanojua poonijioquiaa quiria. Naajuhuj, quiaari puetunu casaajanaa rejeretaquiaa juhujaniya. Janiyari niishiyajuhuj, majaari quia shanacunu quiquiaa sesa miijiaca nia tajinia. Naajuhuj, quiaari cuno sapojonuujuaa nequesorecanu, noo pojori

canapuete tama sequeriquiaajaajani: “Canaari Jesu jiyaramiquishanoni”. Naa quia nequesoreesacari nojoritij, quiaari niishiquianu nojoriiri sapojonuujuaca seetanujuanaa. ³ Quiaari puetunujuanaa tاراatia quia miiniu rejeretaquiaa, cucua tiuujia quia quiniucua. Quiaari pueyaracaanu quiria poonijiojua maninia. Quia sama-reesacari, naajaa, majaari quia tarinitianu quiquiaa. ⁴ Puetunu naa quia miishanojuanaani, cunoori maninia. Saniniuujia, cua sequesano quia tojiri. Majaari panijia quia quiniu tari, juhua coteenujua. Majaari cuno cua maniniucuanu cutara. ⁵ Cunora, quia niishiri taa jiyanhua cua panijia quia quiquiaarini. Quioojia quia tacatorohua cucua, maninia miijia quia quiniuhua, taa quia quiquiaari coteenucajani. Quiaa jaara quioojia tacatoyaquiri, janiyari quiocua niniutianiyani, Éfeso tiacajiniji cua patanura quia samaritiu nujuataja. ⁶ Quiaari maninia-juhuaj, sacuaraatia casaa Nicolás niishitiojosano tojjijaca miishano soojea quia quiniucua. Janiyari cuno pojori miishano soyajuhuj. Nio cua sequesano quiajaniyani, cunoori puetunu cua pueyarajanaa. ⁷ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaatiani, janiyari nojori jiyatenutaniya cuno naanajiniji mioojuarani, pueyaracaanu rishijijaca nojori quiniuria’ ”.

Esmirna tiacajinia quiniaa Pueyaso pueya maanuucuaara naajionee

⁸ Jiyaniiijia Jesucristoori naa cua sequereejuhuj:

—Esmirna tiacajinia quijia cua seruucuaara quia naajiore, Pueyaso pueya maanu jiitianani. Naa quia sequere nojuaja: “Naa sequeyari cante puetunu casaajanaa coteetenacujani, na tucuatania. Nojuacuajaari

cusoquiaari, na nuhuaji samiitiaquiaarihuari. Janiyacuajaari nojuajani. ⁹ ‘Janiyacujaari niishiyani, quiaari naquiya miishaaquiaa. Quiaari casamiijujuhuaj. Naajaa, quiaari jyanohua casamiriacaaja niya cua shuriucuni. Janiyari niishiyajuhuj, cuno Judiocuacaari quia sesacaquiaa. Nojoriiri tama sequequiaajaacujua nojorini-aari Pueyaso pueya cutara, Judiocuaca nojori quiniuucua. Maja naatej. Nojori cutaraari Satanás pueya maanu. Satanáscuajaari samaruhua jyaniiija. ¹⁰ Quiaari naquiya miishaanutaniya. Naajaa, majaari puerenu. Satanásri noojiaqueya niajanijajinijinio nujuatejotenutaniya nujuatejojuajinia nia sanishaanura, niaate cucua tiujujaca seetanujuanaa. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojjia quia quiriquia pueyaracaanu, quiaa cuara shaajeyarejatiija. Quiaa jaara naa miiritij, janiyari quia jiyatenutaniya jyanohua shuquiriaatia quijia quia quiniuria pueyaracaanuni. Nio cua sequesano quiajanijani, cunoori puetunu cua pueyarajanaa. ¹¹ Cante numaacani, nojori cuara tojiiria Pueyaso Sohuanu sequesano Pueyaso pueya maapuera. Cante cucua na tiuuniuucua naquiya na miishaanu rejeretaja pueyaracaanuni, nojuaja cutaraari maja que-naaja naquiya na miishaanu quiniutaniya Pueyaso sanitiosacari na ruuretajaca. Na ruuretajaca cutaraari quejoosanutaniya mani noshijia caminiajini’ ”.

Pérgamo tiacajinia quinia Pueyaso pueya maanuucara naajione

¹² Jyaniiija Jesucristoori socua cua sequeree:

—Pérgamo tiacajinia quijia cua seruucua quia naajiorejuhuaj, Pueyaso pueya maanu jitianani. Naa quia sequere nojuaja: “Nijiniaquetucuja mueruu jitianani naa sequeya: ¹³ ‘Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojjia quiquiaa. Majaari cucua quia tiuuniujiniji

quia seetanu quiquiaa. Cua seru Antipas cutaraari mosaaquiaari janiyajiniji pohuatanu na tarinitiaaquini-uucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jiyanohua maninia. ¹⁴ Saniniuujia, maja cutaraari nio cua maniniucuanu: tamasaca nijaniyajinijinoori maja na tarinitianu paniniu sesa na miijionu. Nojoriiri supuetana Balaam niishitijosano tojijiaca quiyajaa. Balaamcuajaari Israel pueya paraca Balac niishitiojoquiaari na pueya cuaara shiniujuuria Israel pueya, jaarajaaja Israel pueya miniuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiata shipinijosano casaacuara puecosano quiquiaaricujani juhua Pueyasooacara. Naa sacuaraatia nojori queranacujasacari nojori paraatatej, Israel pueyari cuniquijia cuno taatujuri numuetucujuquiaarijuhuaj. ¹⁵ Naajuhuj, majaari nio cua maniniucuanu: noojiaqueya nijaniyajinijinoori maja na tarinitianu paniniu jiyanohua sacuaraatia casaa Nicolás niishitijosano. ¹⁶ Quiaari nareja niquiquiaa sacuaraatia nojori miijionu. Cunora, quioojia quia tacatorohua cucua, janiya mariqui quiocua quiaareeri cuno sacuaraatia miijiacua cua miaquejonura cua rupaamaji mueranacujua mueruuta. ¹⁷ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaaja rejetejani, janiyari na mianuutenutaniya jiyocuaaanu cua racatasano cua pueyarano cua riuriotacajinijini. Janiyari na niqutionutaniya cohuajajau saajiajuhuaj, teyanoocua quiarinio sesa naajiotasano quiniutianiyacuajani. Majaari tamonu niishiniu quiniutianiya cuno sesa. Saaja na camaruuuri na niishiniutianiya, cana cua niqutionutaniya cuno saajiacujani' ”.

Tiyatira tiacajinia quiniaa Pueyaso pueya maanuucua

naqjionee

¹⁸ Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuaara quia naajiore, Pueyaso pueya maanu jiitianani. Naa quia sequere nojuaja: “Pueyaso Niyanu, juhua mani rimi-anacuyano namijiaaracani, juhua bronce mohuaquis-hano shacantuuca niohuacaracajuhuj, nojuajaari naa quia sequeya: ¹⁹ ‘Janiyari puetunu quia miishanojuanaa niishiyani. Janiyacuajaari niishiyani, quiaari Pueyaso panijia, pueya panijiano. Quiaacuajaari Pueyasocua tiuujia. Quiaari maninia poonijiona Pueyasora, pueya quia naacunura. Naajuhuj, quiaari juhuajaniya rejeretaquiaa quiaa jaara taraatia miishaariquia. Janiyari niishiyajuhuj, puetunujuanaa quia miishano quiria quiarijiani, cunoori socua queraatia coteenu quia miishanojiniji. ²⁰ Saniniuujia, nio cutaraari cua maninucaaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujiunia pueyara. Quiaari juhuajaniya na shanacuquiaa saaja, sacuaraatia na niishitiojosanota na sapojonura cua pueya. Naa sacuaraatia na niishitiojosanotatej, cuno maajiiri cua pueya shiniujuiquiaa juhuajaniya nojori numuetucujunura na camishoo maajipohua. Cua pueya shiniujuiquiaajaariuhuj nojori miaquenuunura noo shu, teyanote juaashiquiacata shipinijosano taucuaca pueyasohuacuara puecoosano quiquiaacuajani. ²¹ Janiyacuajaari tari cuno maaji sashiquianu juucuan, noojia na tacatonura cucua. Majaari na tarinitianu paniniu paanatu na quiniu. ²² Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuj, na numuetucunujuaca jaara noojia tacatoyaquiri sesa nojori miiniujiniji, janiyari jiyanoehua naquiya miiniutianiya no-

jorini. ²³ Noo maajipohuajuhuj, paanaturjuria quinioni, cuno paanatujuanaa niishitiojonuucua nojori juhua necojorini, janiyari puetunu nojorijianaa puecoonutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujiajiniajanaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia miijiaca niajaniyajinijinio maninia miiniutianiyani. Niajaniyajinijinio sesa miijiaca saniniuujia, nojoriiri saniitiosaanutaniyacujua. ²⁴ Tiyatira tiacajinia quiniaa noojiaqueya niajaniyajinijinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhuj, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijiaca jiyaniquishanoni “jiyajeneta casaa, Satanásjiniji niishishano”. Naa nia ruuretanuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarjia niajaniya. ²⁵ Saaja tama nia cuaqueyajaaja nia cojuare jiyanohua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. ²⁶ Cante cua panishano miiquiaa pueyaracaanuni cuaara shaajeyarejaatijia, janiyari cuno pueyano jiyatenutaniya tamasaca pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuriacuaani. ²⁷ Jiyaniijianucuaa cua jiyatesano pueyani, nojoriiri cumaacaraca quiniutianiya na jiitiasano pueya na tojitinuria nojuaja. Na tojitiaashijiacua na saniitiosacari saniniuujia, nojori piyonutaniya jacanauraari, juhua cumamacata pishano conatu. ²⁸ Naajuhuj, janiyari joojea na niqutionutaniyani, juhuaquetaja rijiani, shacantuuca quijia na quiniuria juhua janiyajuhuj. ²⁹ Cante numaaracani, nojuaja cuaara tojiiria Pueyaso Sohuanu sequesano puetunu Pueyaso pueya maapuerajanaa’ ”.

3

Sardis tiacajinia quiniaa Pueyaso pueya maanuucuaara naajionee

¹Jiyaniiija Jesucristoori socua cua sequereee:

—Sardis tiacajinia quijia cua seruucuaara quia naajiorejuhuaj, Pueyaso pueya maanu jiitianani. Naa quia sequere nojuaja: “Naa sequeyari cante Pueyaso Sohuanu jiyaramiquiquiaa cuno siete Pueyaso pueya maapueecuacuajani, nojori jiuujiajinia na poonijionura. Nojuacuajaari cuno siete Pueyaso pueya maapue jiitianaa Jiitianajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ² ¡Quia maquenu quia jatare! ¡Suteja quia quiri! Quia cumaquiri noo pojori canapuete jatarinitiaja rishiyajani. Quera cusonuyari. Janiyari Pueyasora quia miishano niquiquiaani. Majaari maninia na quiniu cua Pueyasora. ³ Quiaacuajaari maninia niishitiojosaaquiaari Pueyaso rupaa. Taa quia niishitiojosaaquiaaricuajani, cuno quia niishiriohua. Quioojia quia tacatorohua Pueyasooqua, seetanujuanaa na rupaa tojijia quia quiniuria. Quiaa jaara suteja quiniu paniyaquiri, janiyari canashiyaquiji quiocua niniutianiya juhua nohuasejuani, quia jyanishacari maja naasucua juhuanujuaja cua tiuquiniu quiniutianihua. ⁴ Quia jiitiasano pueyajinijinio cuniqui Sardis tiacajiniani, secaja nojorijinijinioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curuushojiyaquishano janiyara. Naaratej, janiyari nojori cushiyotenutaniya cohuaqueya toqueni, cuata nojori rucuanenonura, cua rupeanaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujaca nojori quishacari. ⁵ Canapuete naa sesa miiniu ruuretajacani cua tojitajaca nojori quiniuucua, nojoriiri

naa cohuajaqueya toqueya cushiyotesocoriquianojuhuaj. Cunoori quiniutianiya tojetaarucujanaa sesa miyashiji-acara cua jiyatesacari nojori. Naajuhuj, majaari cua tu-ujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, jani-yari nojori jaatianutaniya cua Queecuan, na seya tacojiri-ano, cua sequenura nojoriiri cua timitiasano pueyaniyo-jua. ⁶ Cunora, cante numaacani, nojuaja cuaara tojiiria Pueyaso Sohuanu sequesano Pueyaso pueya maapuera' ”.

Filadelfia tiacajinia quiniaa Pueyaso pueya maanuucuaa naajionee

⁷ Jiyaniijia Jesucristoori socua cua sequeree:

—Filadelfia tiacajinia quijia cua seruucuaa quia naa-jiorejuhuaj, Pueyaso pueya maanu jiitianani. Naa quia sequere nojuaja: “Cua tojiri. Janiyacuajaari tojetaaru-cujanaa maninia miijiani, cua Que tojjia cua quiniu-ucua. Puetunu cua sequesanojuanaari seetanujuanaa. Jiyaniijajanaa cua quiniuucua cua supuetana David niti, janiyari cua Que tiotiu riatataja jiitianani, cua saquiri-ojosano pueya cua tiuquinitianura cua Queecua. Janiya jaara cuno tiotiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. ⁸ Janiyari puetunu quia miishanojuanaa niishiyani. Naajuhuj, janiyacu-jaari juhua tiotiu riatarucuaa quiocuajini, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano tojijiacuaja. Naajuhuj, majaari cua soojeaca pueya niquiara quia tamacanu quiquianu janiya. ⁹ Naa maninia quia miiniu-ucua janiyaracuaatej, janiyari naa maninia miiniutianiya quiarajuhuj. Janiyari noojiaqueya Satanás pueya maanu-jinijinio mojoquetanijionutaniya quiocuarani. Cuno po-joriiri tama na cuaqueyajaaja sequeja, nojoriniaari see-

tanujuanaa Pueyaso pueya, Judiocuaca nojori quiniuucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuujia quia quiniuucua. ¹⁰ Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujuaanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miniutia nojori, janiyacuajaari jiyacari nia cojuanutaniyani. ¹¹ Quia niishiri: janiyari quera tiuquiuhuani. Majaari quia tarinitianu cua rupaa tojiniu, quiaa mariqui sapojosareeri cucuaji quia rupatenura. Naacujitij, quiaa jaara cucuaji catere, majaari Pueyaso niquitionu quiniutianiya quiarano na racatasano. ¹² Cante sesa miiniu samiritiaja saajani, cua rupaa tojijia na quiniuucua, janiyari jiyocuacaanu Pueyaso Secojojua tiajinia na nujuatentianiya juhua morijiuni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuj, janiyari cunó pueyanoocua naajiotanutaniya cua Que Pueyaso sesani, quiarinio cua sesajuhuj, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasaariquiano. ¹³ Cante nu-maacarani, nojuaja cuara tojiiria Pueyaso Sohuanu sequesano Pueyaso pueya maapuera”.

Laodicea tiacajinia quiniaa Pueyaso pueya maanuucuaa naqjionee

¹⁴ Jiyaniijia Jesucristoori socua naa cua sequeree:

—Laodicea tiacajinia quijia cua seruucuaa quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Naa sequeyari noo pueyano cana sequesante seetanu rupaajanaacua-jani. Puetunu na caminiujiushanojuanaa Pueyasojiniji

quiarani, cunoori seetanujuanaa. Pueyasoori na shipinitiquiaari puetunu na shipinishano casaajanaa. Cunocua-jaari janiya. Cunora, cua tojiri. ¹⁵ 'Janiyari puetunu quia miishanojuanaa niishiyani. Quiaari najuhuana quijia, quia miyaquiniuucua cua sequesano. Seetanujuanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. ¹⁶ Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuanaa cua tojijia quiriquia, janiya maara quia timitiarenii. Saniniuujia, najuhuana cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani. ¹⁷ Quiaari tama sequequiaajaacujua: 'Janiyari casamiriacani. Janiyari puetunu cua panishanojuanaa jiiitaani maninia miiijia cua quiniuucua'. Maja cutaraari quia niishiniu quioojiaari cusosu. Janiyara, quiaari tojetaarucujanaa casamiiiju, cariyoujaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. ¹⁸ Cunora, janiyari quia numooteyani moseeca pueyanonaa, cua rupaa tojijia quia quiri, seetanujuanaa casamiriaca quia quiniuria. Naajuhuj, maninia miiijia quia quiriquia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhuj, cua niishitijia quia masere cutara, quioojia namijia riatenura, seetanujuanaa maninia niqijia quia quiniuria. ¹⁹ Janiyari puetunu cua panishano pueyajanaa nacasujuani, nojori saniitiojuajuhuj. Cunora, quioojia quia tacatore cucua. Tama quioojiaaja quia shiniujiurijiuhuaj shamaatia cua tojijia quia quiniuria. ²⁰ Cua tojiri. Janiyari quioojia tiootiujiniji jiiquioonuujiyani. Cante cua tojiyani, nojuaja cuara na tiotiu riataara cucuaji. Janiyacua nocua tiuquiumiani, nata cua miaquenura, shuquiriaatia cua pocoojonura nata. ²¹ Janiyari cua Paraca shocotaquiaarini cua Que tojijia cua quiniuucua. Naaratej, cua Queeri

cua cajitiquiaari na shuriucua, Jiyaniijijanaa cajitiujinia. Naajuhuj, janiyari Sesaaca shocotajaca cajitijionutaniya cua shuriucua, jiyaniijianucua nojori quiniurijuhuj. ²² Cante numaacani, nojuaja cuara tojiria Pueyaso Sohanu sequesano Pueyaso pueya maapuera' ”.

4

Juan niquishacari Jiyocuacaanu Quijiaari maniniuhuaque-etasaariquiaa

¹ Na nuhuaji, janiyari mauquiaarini. Janiyari saaja jiya cajiniocua tiotiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupaajaari cua pacutequiaariuhua sequenu. Naa cua sequereeri:

—Miji quia tacama. Janiyari quia niquitiniutianiyani taa nio pa quishacari nuhuaji mijiria quiniaa miishaanutanianiyani.

² Jiyacaritij, Pueyaso Sohanuuri cucua niquiaari. Cua sohanu tacaniquiaari jiyocuacaanuuri. Janiyari jiyacari Jiyaniijijanaa cajituu niquiriini. Pueyanoori tii cajiriquiaa. ³ Nojuajaari shanohua niquishano quiriquiaa, jiyanoohua shacantuuca juhua jaspe saajia, jiyanoohua naatuucajuhuj, juhua cornalina saajia. Naashiiri na cajituu caco nuuariquiaa. Jiyanoohua shacantuuca quiriquiaari neeruuca, pocojuanaque juhua esmeralda saajia. ⁴ Janiyari socua veinticuatro cajitiucua niquirii Jiyaniijijanaa cajituu shocuani. Tii cajituriquiaari veinticuatro niishijiaca jiyaniijianucua. Cohuajaque toqueya cushiyonuuriquiaari, orojiniji shipinijosano nacaqueyanio. ⁵ Jiyaniijijanaa cajitiujiniji, miacanaari nunujuriquiaa. Jiyanoohua majacuriquiaajaariuhuj. Jiyaniijijanaa cajituu tacoji, tii noshiquioriquiaari siete samari. Cunocujaari siete Pueyaso Sohanu, puetunu tiqiyocuajanaa quijia na quiniucua. ⁶ Jiyaniijijanaa

cajituu tacoji, juhua jiyanoehua puereetuuca caminiaari quiriqiaajuhuaaj, juhua cohuaja motiiquiao maatia niqushiyari na tamajiria.

Jiyaniijajanaa cajishaqui, cuatro saminiio casaari quiriqiaajuhuaaj, puetunu na shocujanaa. Nojoriiri jiyanoehua queraatia namijjaaraca quiriqiaa, na jiriqiaacumaji, na nijiniaacumajinio. ⁷ Cuno cuatro saminiucua casaari tamaatia niqushano quiriqiaa tamonujiniji. Niquiriyatuuri juhua juurunu sare niqushano quiriqiaa. Tamonuuri juhua seru juunu caya niqushano quiriqiaa. Tamonu casaa jiquicoori juhua pueyano jiquico niqushano quiriqiaa. Tamonuuri juhua surohua miooru jaano niqushaariqiaacujua. ⁸ Puetunu cuno cuatro saminiio casaajanaari seis nesuhuaraca quiriqiaa. Puetunu nojori cuaqueyacumajanaa quiriqiaari na namijjaa, nocuaji na niqutiaja, na nijiniara na niqutiajanio. Nojoriiri pueyaracaanu Pueyaso maniniuhuaqueetariqiaa, juuca, niucuanio. Majaari nojori tarinitianu quiriqiaa naa na sequetunu:

—;Jiyaniijajanaanaa, quiaari saa maniniaja, jiyanoehua maninia, tojetaarucujanaa maninia miiija! Quiaacua-jaari Pueyaso, puetunu cumaacarajanaa. Quiaari quijajuhuanajaj. Majaari quia supueno quiquiaari. Quiaari quia pueyacia tacateriquianohua.

⁹ Cuno cuatro saminiio casaari naa pueyaracaanu maniniuhuaqueetariqiaa Jiyaniijajanaa, na cajitujinia cajiyano, pueyaracaanu Jiyaniijajanaa quiriqiano na quiniucua. ¹⁰ Naa pueyaracaanu cuno cuatro saminiio casaa timitiasacari Jiyaniijajanaacuaatej, cuno veinticuatro niishijiaa jiyaniijanucuaari jaarajaaja mojuqueta-coqueequiaa Jiyaniijajanaacuara. Nojoriiri na tuhuajaa jartaqueequiaa Jiyaniijajanaa cajituu pajama, naa na sequenuta:

¹¹ —Nioori quiara, Jiyaniijjanaa. Quiaa cutaraari Jiyaniijijajanaa, maja canaa. Quiaacuajaari canaa Pueyaso. Quiaa cuaara timitiasaaria pueyaracaanu, jiyanoehua maninia shacantuuca quijia quiniuucua, puetunu cumaacacajanaa quia quiniuucujuhuj. Quiaacuajaari puetunu casaajanaa shipiniquiaari. Tama quia paniniuucujaja, quiaari na shipiniquiaari.

5

Rupanacujusano naajioneejiniji pohuatasano, Borrego Niquiojuajininio

¹ Na nuhuaji, janiyari Jiyaniijijajanaa cajitiujinia cajinia juaashiquiajinia niquirii naajioneeni. Na miaquetajara na cacariquiaari. Cuno tucuanee naajioneeri jiuniososano quiriquiaa. Naajioori nocua quiriquiaa, na nijinia, na jiniacumano. Cuno naajioneejinia, siete naajioori tii naajio-tasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. ² Jiyacaritij, janiyari jiyanoehua cumaacaraca Pueyaso seru niquiriini. Naa nequesoreeriquiaari jiyanoehua na nacanuta:

—¿Cante seetanujuanaa maninia miijia cutarani? Cuno cuaara rupartaara rupanacutasano, na riatanura cuno naajione.

³ Jiyacaritij, majaari quenaaja maninia miijia quiniu quiquiaari jiyocuacaanu, jiyajinia, jiya cariquimiano na riatanura cuno jiuniososano naajione. Tojetaarucujajanaa shaaqui quiquiaariiri cuno naajione serojoriquiano. ⁴ Naaratej, janiyari jiyanoehua nujuqueriquiaani, tojetaarucujajanaa shaaqui maninia miijia quiyaquiniuucua cuno naajio na riatanura, na serojonurano. ⁵ Cua nujuquesacari, tamonu cuno veinticuatro niishijiaca jiyaniijianucujajininioori cua sequeree:

—Maja nujuquenu. Quia cumantare. Quia niquiri. Pa Jiyaniijijajanaacuajaari jiyanoehua cumaacaraca.

Tariucuacaanu Pueyaso Rupaajinia, nojuacuajaari miriqui sequeshiya Juurunu sareta, Judá niquiohuacuajinio supueriquiano, Jiyaniijajanaa na quiniuria na supuetana David niti. Nojuacuajaari pa paraca Satanás shocotana, tojetaarucuajanaa Jiyaniijia Pueyaso tojjia na quiniuucua. Naaratej, nojuaja na naata cuno siete naajio coteeja rupanacujutasano rupareetanu na serojosocoriquiano.

⁶ Jiyacaritij, janiyari Borrego Niquiojua niquiriini Jiyaniijajanaa cajitü tacoji nujuuano, cuno cuatro saminio casaa tajinianio. Cuno veinticuatro niishijiaa jiyaniijianucuaari na shocua quiriquiaajuhuj. Borrego Niquiojuaari seetanujuanaa juhua mosano samiitianohua niquishaariquiaa. Nojuajaari siete jiyaniijia tuhuajaaraca quiriquiaa, puetunu cumaacaracajanaa na quiniuucua. Naajuhuj, siete namijiaaraca quiriquiaari. Cuno na siete namijiaani, cunocuajaari Pueyaso Sohuanu, Pueyaso jiyaramiquishano puetunu mijirijajanaa. ⁷ Cua niquishacari, Borrego Niquiojuaari Jiyaniijajanaa cajitüjinia cajiyano juaashiquiajiniji jiuniocosano naajionee masetaree. ⁸ Nojuaja jaara cuno naajionee cacariquiaa tari, cuno cuatro saminio casaari nocuara mojuquetacoquiaari, cuno veinticuatro niishijiaa jiyaniijianucuanio. Puetunu nojorijianaari taquiniojosano casaa jiitariquiaa. Naajuhuj, orojiniji shipinijosano suhuococua mueetacoriquiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. ⁹ Nojoriiri Borrego Niquiojua jaaquequejotariquiaa nio quiarinio jaaquequejosano:

—Saaja quiajaniyari seetanujuanaa maninia miihia. Naaratej, quia naata cuno naajionee patanu quia rupareetanura na rupanacujusano. Quiaari jiyanhua maninia. Naaratej, quiaari jiyajinia quiniaacuara mosaaquiaari. Quiaari

quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajinijiniojuanaa, puetunu tiacajinijiniojuanaajuhuaaj, puetunu jiyacajinijiniojuanaanio. ¹⁰ Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secojonaa, pueyaracaanu nojori maniniuhuaqueetanura pa Pueyaso. Nojoriiri jiyacua jiyaniijianucua quiriquianojuhuaaj.

¹¹ Na nuhuaji janiyari tojetaarucujanaa jiyanohua jiyanohua queraatia Pueyaso seya niquiriini. Jiyaniijijajanaa cajitiu shocua mariquiaari, cuno cuatro saminio casaa shocuajuhuaaj, niishijiaca jiyaniijianucua shocuanio. Nojoriiri jiyanohua queraatia quiquiaari, juhua jaaquia, serojiyaquishoo. Janiyari nojori tojirii pa Jiyaniijia Jesu maniniuhuaqueetaanoni. ¹² Nojoriiri naa na sequeturiquiaa na nacanuta:

—¡Pa Jiyaniijiaari jiyanohua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiiria Jiyaniijijajanaa pueyaracaanura. Saaja nojuaja cuaara jiitiaara puetunu casamijianaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quijiaca casaajanaa cuaara tojtiaara pa Jiyaniijia. Saaja nojuaja cuaara quiiria jiyanohua timitiasano. Puetunu quijiacajanaa cuaara na maniniuhuaqueetaara.

¹³ Naajuhuaaj, janiyari puetunu Pueyaso shipinishano saminio casaajanaa tojiriini, jiyocuacaanu quijiaca, jiyajinia quijiaca, jiya cariquimia quijiacajuhuaaj, shoniniacu caminiajinia quijiacanio. Puetunu nojorijianaari jiyanohua na timiniutia sequeturiquiaa:

—¡Cuno, na shacantuuca cumaacajinia cajiyani, Borrego Niquiojuanio, nojori cuaara maniniuhuaque-
etasaaria pueyaracaanu! ¡Puetunu casaajanaa
cuaara tojitiaara nojori pueyaracaanu! ¡Nojori
cuaara timitiasaariajuhuaj! ¡Saa nojorijia cuaara
na cumaaca jiitiaara pueyaracaanura!

¹⁴ Jiyacaritij, cuno cuatro saminio casaari nojori ri-
uhuaneriquiaa saniniuuja:

—¡Taaquiririnij! ¡Cuaara naa quiiriatej!

Cuno veinticuatro niishijiaca jiyaniijianucuaari sanini-
uuja mojuquetacoqueecujua cuno pueyaracaanu Quijia-
caacuara, nojori na shuquiritianura.

6

*Jiuniocosano naajioneecua seis rupanacujutasano ruparee-
tasacari*

¹ Na nuhuaji, cua shootiasacari, Borrego Niquiojuaari
coteenujanaa cuno naajioneejinia rupanacutasano ru-
partaree. Naa miiriiri cua niqutishaanura taa mijiria
quiniaa miishaanutaniya jiyanoehua naquiyani, quera nio
jiya puequesacari. Jiyacaritij, janiyari tamonu cuno cua-
tro saminio casaajinijinio tojirii sequeyanoni: “¡Miji!”. Na
pocuanuuri juhua miacana majanu tojishano quiriquiaa.

² Naa na sequesacaritij, janiyari cohujohuana caballo
niquirii nocua canujyanoni. Na nijinia cajiniaari balista
cacariquiaa. Jiyacaritij, jiyaniijiara shipinishano nacaque
cushitishaareeri. Na nuhuaji, na caballoori na netetaaree
jiyocua na quianura, tii na miaquejonura Pueyaso paraa.
Majaari quenaaja na nujuatasaanu quiniutianiya.

³ Na nuhuaji, Borrego Niquiojuaari segundo rupana-
cutasano rupartaree. Janiyari jiyacari segundo saminio
casaajinijinio tojirii sequeyanoni: “¡Miji!” ⁴ Naa na
sequesacaritij, naatuhuana caballoori nocua canujumaa.
Na nijinia cajiniaari cumaaca niqutiosaare. Naacujitij,

nojuajaari mijiria quijiaca tojetenutaniya tama nojori miaquetoojonurajaaja. Cunora, nojuajaari puereetunee nijiniaquetucujaja mueruu niqitiosaaree.

⁵ Na nuhuaji, Borrego Niquiojuaari tercero rupanacutasano rupartaree. Janiyari jiyacari tercero cuno saminio casaajinijinio tojirii sequeyanoni: “¡Miji!” Jiyacaritij, janiyari mueruhuana caballo niquirii nocua canujiyanoni. Na nijinia cajiniaari niiquia shanacujutaja jaasutetariquiaa, mijiria quiniaara miajajau shanacujusaanura nojori serotasaanura. ⁶Jiyacaritij, janiyari cuno cuatro saminio casaa tajiniji rupaa tojirii naa sequeyanoni:

—Niquiriyatu juuca poonijionu sami, cuaara niqitiosaaria saaja niquiriyatu kilo trigo jajau. Jaara trigo jajau paniyaquiri, cuaara niqitiosaaria tres kilo cebada jajau. Saniniuujia, majaari shiyocua shanacujunu cutara, vinonio. Cunocujaaari queraafia quiniutianiya cutara.

⁷ Na nuhuaji, Borrego Niquiojuaari cuarto rupanacutasano rupartaree. Jiyacaritij, janiyari cuarto saminio casaa tojirii naa sequeyanoni: “¡Miji!” ⁸ Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuana”. Macunucua Quiquioori na neteyotariquiaa, Cusojuana puecoosano na rijionura na miitiasocoriquiano. Nojoriiri cumaaca niqitiosaaree jiyanohua queraatia pueya na cusojuanura. Naacuajitij, jiyanohua queraatia pueyari puecoosaanutaniya miaquetoojosacari. Tamasacaari cusuunutananiya jiyanohua miaajesacari. Tamasacaari paaqueja cusonu cusonuutanutaniya. Naajuhuj, tamasaacari sareya sootesaanutaniya. Sacocua satejosaanutaniyajaariuhuj. Naacuajitij, jiyanohua jiyanohua queraatia pueyari cusojuasaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocujinijiniojanaa.

⁹ Na nuhuaji, Borrego Niquiojuaari quinto rupanacutasano rupartaree. Jiyacaritij, janiyari Pueyasooacara catijiasaqui juhuacutu cariquiaco niquirii Pueyaso pueya sohuanuhuani, noo pojori canapuate puecoosaaquiaaricujani Pueyaso Rupaa tojijiaca nojori quiniuucua, Jesucristojiniji nojori pohuatanuucujuhuj. ¹⁰ Jiyacaritij, nojoriiri naa jiyanohua nacaree:

—¡Jiyaniijianaa! ¡Quiaari saa maninijaa! Quiaari quia sequesano miiija seetanujuanaa. ¿Taa quia tarishiniutianiyajaara canaa puecoonaa quia nequesoreenurani, nojori quia naminiuria canaacua saniniuuja?

¹¹ Jiyacaritij, puetunu nojorijianaari cohuajaque toqueya niqutiojosaaree. Nojoriiri naa sequesaaaree:

—Socua rupaquijia nia samaaterejaara, Pueyaso saquiriojosano niarta Pueyaso pueyajinijinio cuara puecoosaaria nia shiriajaatijia, taa nia puecoosaaquiaaricuaani.

¹² Na nuhuaji, Borrego Niquiojuaari sexto rupanacutasano rupartaree. Jiyacaritij, rijiaari jiya jiuuquiujiutiaree jiyanohua. Janiyari na niquiriquiaani. Pananuuri mueruucara quiquii juhua mueruque toque. Racaari naatuucara quiquii juhua nanaca. ¹³ Riyari jiya cajiniocujaji toteree jiyocua, taa satuna totequiaa jiyanohua paratucaricuaani. ¹⁴ Jiya cajiniocuaari shaajeejuhuaj, juhua tucuanee naajioneeri jiuniosaaaree. Shoniniacu caminijinia, puetunu jiya tucuaatiajajanaa, puetunu tuhuananuhajuhuj, puetunu cunojuanaari jiyajeetaquee na nujuatusajiji.

¹⁵ Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhajiniajuhuj. Naa jamaatiushiijaariuhua noo pojori: pueyacia paaretajaca na cumaacatej, soldadohua jiyaniijianucua, jiyanohua casamiriaca pueya, pueya tojishano pueya, poonitijosano pueyajuhuj, puetunu narta pueyajanaanio. Puetunu

pueyajanaari naa mashiriquiaa juucua. ¹⁶ Nojoriiri tuhuananuhua sequeriquiaa, sainio:

—¡Canaacua nia tiyare canaa nia jamonura cunoocuaji, na cajitiujinia cajiya na shacantuuca cumaacajiniani! ¡Canaa nia jamojore maja na niqiara canaa quiniuria, naajuhuj, maja Borrego Niquiojua saniitionura canaa, jiyanohua na juaashacari! ¹⁷ Quiarijiacuajaari Pueyaso saniitionu juuca. Jiyanohua puereeta. ¿Cante na naata na nujuatanuni? Shaaqui.

7

Pueyaso saquiriojosano pueyajiniji pohuatasano, Israel niquiohuacuajinio supueno pueyajinjinio

¹ Naa cua niquiniu nuhuajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajarano. Nojoriiri na nujuatusaquiiji paratu tenujuriquiaa maja na piyarojonura jiya, shoniniacu caminia, nacuhuanio.

² Jiyacarijiuhuj, janiyari socua tamonu Pueyaso seru niquirii jiya pajamaji niyanoni. Pueyaso naajio jiri-ataja casaa cacariquiaari. Nojuajaari narta cuatro Pueyaso seyacua nacaree jiyanohua, noo pojoriicua canapete cumaacaraca quiriquiaacuajani nojori sesonura jiya, shoniniacu caminiano. Naa nojori sequereeri:

³ —¡Cuaara! ¡Maja juhuanajuaja jiya nia sesonu, shoniniacu caminia, nacuhuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴ Janiyari jiyacari tojiriini taa pueyate na jiniji jirioosaareeni. Puetunu supuetana Israel doce niquiohuacuajinio supueno pueyapuejinjinioori ciento cuarenta y cuatro mil pueya jirioosaaree.

⁵ Naacuajitij, supuetana Judá niquiohuacuajinio

supueno pueyajinijini, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. ⁶ Supuetana Aser niquiohuacuajinio supueno pueyajinijinio, doce miljuhuaj. Supuetana Neftalí niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. ⁷ Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. ⁸ Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹ Naa cua niquitishaanu nuhuajitij, janiyari jiyanohua queraatia pueya niquirii maanoni juhua tereya. Nojori-iri puetunu nio tiqiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaano. Quiriquiaajaariuhua puetunu tamaatia ru-paaca pocuajacajinijiniojuanaa, puetunu tiqiyocua tiacajinijiniojuanaano. Naa tojetaarucujanaa jiyanohua queraatia nojori quiniuucuatej, majaari na naata serojosaanu quiriquiaa. Nojoriiri Pueyaso shacantuuca cajitiu tacoji nujuaturiquiaa, Borrego Niquiojua tacojinio. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuucua,

nojoriiri juhua teruhuanajaquera niquishano mueeta-coriquiaa. ¹⁰ Puetunu nojorijianaari naa mariyata sequeriquiaa na nacanuta:

—¡Jiyanhua maniniaari pa Que Pueyaso, na shacantuuca cajitiujinia cajiyani, Borrego Niquiojuajuhuj. Nojoricuajaari pa jiyanooquiaari, tojetaarucujanaa quiariniora jatanishano pa quiniuria!

¹¹ Naajuhuj, puetunu Pueyaso seyajanaa, canapuate shacantuuca cajitiu shocua nujuaturiquiaacuajani, niishi-jiaca jiyaniijianucua shocujuhuj, cuno cuatro saminio casaa shocuanio, nojoriiri Pueyasoocuaa jacamaturee nojori timitianura nojuaja. ¹² Pueyaso na timitiatusacari, naa sequetureeri:

—¡Taaquiririnij, seetanujuanaacuaj! ¡Canaari pueyara-caanu quia maniniuhaqueetanutaniyani!
 ¡Quiaacuajaari canaa timitiasano! ¡Saaja quiajanitari seetanujuanaa niishijia cutara!
 ¡Paacarasho, canaa Pueyasonaa! ¡Quiaa cuara tojishaaria pueyaracaanu! ¡Quiaari canaa Jiyaniijajanaa pueyaracaanura! ¡Quiaari puetunu cumaacaracajanaa maninia quia jitianura quia shipinishano! ¡Cuara naa quiiria pueyaracaanu, pueyaracaanutej!

¹³ Jiyacaritij, tamonu cuno veinticuatro niishijia jiyaniijianucujinijinioori cua nequesotaree:

—¿Canapuate cuno pojorini, cohuajaque toqueyara-cani? ¿Tejenote nojorini?

¹⁴ Janiyari na riuquaree saajani:

—Quiaa cutara na niishiya, jiyaniijianaa.

Cua sequereeri:

—Nojoricuajaari jiyajinijinio pueya. Jiyajinia nojori quishacarijia, nojoriiri cuno jiyanhua naquiya miishacari rejeretajaca quiquiaari. Nojori tiuniu-ucua Borrego Niquiojuaacua, nojoriiri puetunu sesa

nojori miishanojiniji juhua nojori toqueya jeequejo-
 quiaari Borrego Niquiojua nanacajinia. Naacuajitij,
 nojoriiri cohuajaqueya toqueya cushiyonuya. ¹⁵ Naa
 Pueyaso jiyanooshano pueya nojori quiniuucuatej, no-
 joriiri Pueyaso cajishaqui tacoji quijiaca. Nojoriiri
 pueyaracaanu tii Pueyaso Secojoua tiajinia miiquiaa
 Pueyaso panishano, juuca, niucuanio, nojori timitiasacari
 nojuaja. Na shacantuuca cumaacajinia cajijiani, noju-
 jaari na cumaaca teutenutaniya nojori caco, jatiqui na
 quiniuria nojoritia pueyaracaanu. ¹⁶ Naacuajitij, ma-
 jaari socua nojori miaajenu quiniutianiya, jiyamuenuio.
 Pananuuri maja socua nojori na catijianu quiniutianiya.
 Naajuhuj, majaari socua nasaatia pananu jartanu no-
 jori niishiniu quiniutianiya. ¹⁷ Borrego Niquiojuacuajani,
 Jiyaniijajanaa cajitiu jiuujiajinia cajijiani, nojuajanaari
 nojori jiitianutaniya juhua tama na borregohuajaaja. No-
 juajaari nojori rucuanejotanutaniya, nojori na raatenura
 pueya samiitianijia mohuaca pacartajajiniji, pueyara-
 caanu shuquiriaatia quijiaca nojori quiniuria. Pueya-
 sojuanaacuajaari nojori namijiaaca tujuunutaniya nojori
 namijajiniji.

8

Séptimo rupanacutasanojiniji pohuatasano, shanhua jaanutaja patajajinijinio

¹ Borrego Niquiojua jaara séptimo rupanacutasano
 rupartaree, cuno naajionee saacatanura puetunujua-
 naa, tojetaarucujanaa sanaacara quiquiri jiyocuaanu
 pueyaracaanura. Maja cua niishiniu, media horaruhua.

² Na nuhuaji, Pueyaso tacoji, janiyari siete Pueyaso
 seya niquirii nujuatiuyanoni. Nojoriiri jiyacari siete
 trompeta niquitiojosaaree. ³ Na nuhuaji, socua ta-
 monu Pueyaso seruuri shanhua jaanutaja pataja pa-
 maa, orojiniji shipinishano. Orojiniji shipinishano Pueya-
 soocuara catijaja casaaco tacoji nujuaseeri, Jiyaniijajanaa

cajitiu tacoji. Queraatia shanohua jaanutaja niquitiosaa-reeri Pueyasooocuara na catijianura. Jaanutajaari cati-jiasaariquiano puetunu Pueyaso pueya secojonuusano-tajanaa, Pueyasooocuara na jaanujunura cuno catijiaja casaajiniji. ⁴ Naacuaajitij, Pueyaso seruuri Pueyaso pueya secojosano tacanirii Pueyasooocuara, shanohua jaanujua najacata. ⁵ Na nuhuaji, cuno Pueyaso seruuri catijiaja casaajiniji na shanohua jaanutaja pataja mishinirii nishiy-ata. Jiyanoehua na majiriataree nio jiyacuaari. Miacanaari ritia nunujuquee. Jiyanoehua majacureeri. Jiyanoehua cojuatunereeri. Rijiaari jiuquiujutiareejuhuj.

Trompetaa jonenejosacari

⁶ Cuno siete Pueyaso seya, trompetaa cacariquiaani, nojoriiri jeeacanecoree na trompetaa na jonenenura. ⁷ Jiyacaritij, niquiriyatu cuno Pueyaso serujinijinioori na trompeta jonenu coteeree. Jiyacaritij, miacanajaa shiniitijuaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuatano.

⁸ Segundo Pueyaso seruuri na trompeta joneneere. Jiyacaritij, casaa juhua puereetuuca tuhuananu noshiyanoori shoniniacu caminiajinia jataaaree. Quera shoniniacu caminia cajiniocuaari nanacara quiquii. ⁹ Puetunu shoniniacu caminiajinia quijiaa casaajanaari, quera na cajiniocua cusonuuree. Naajuhuj, shoniniacu caminiajinia ruhanetasano puereetuuca buqueyajinijinioori, quera puetunu na cajiniocujanaa sesosaaree.

¹⁰ Tercero Pueyaso seruuri na trompeta joneneere. Jiyacaritij, puereetuuca rijiaari jiyocuaanuji tiquii, jiyanoehua nishitiuucua juhua shucuenaja jaamasu noshitishano. Tiyareeri quera na cajiniocua nio jiyacua moocujinia, mijiria cuariyajiniajuhuaj. ¹¹ Cuno rijia

sesaari quiriquiaa “Piiquia”. Cunora, tee cuno rijia tiya-reeni, puetunu cuno mohuacajanaari piiquiara quiquii. Pueya ratusacari cuno mohuaca, queraatia pueyari saaja cusonuuree.

¹² Cuarto Pueyaso seruuri na trompeta joneneree. Jiy-acaritij, casaari pananuucua pitiaree, racaacua, quera na cajiniocua riyacuano. Cunora, puetunu mijiria cuhuata-jaca casaajanaari quera na cajiniocua sesosano quiquii. Quera na cajiniocuaari ninishiqui quiriquiaa. Cunora, panauuri maja na cuhuatanu quiriquiaa quera juuca cajiniocua. Naajuhuj, riya, racanio, majaari na cuhuatanu quiriquiaa quera niucua cajiniocujuhuj.

¹³ Na nuhuaji, janiyari juhua puereetuca surohua miooru niquirii jiya cajiniocuani. Na jaasacari naa nacariquiaa jiyanohuari:

—¡Puereeta, puereeta, puereeta! Seetanujuanaa jiyanohua puereeta quiniutianiyari jiyacua quijiaca pueyara, jiuujianaraca cureecono Pueyaso seya jaara jonenere, canapuate joneneyaquiyajaa juhuanujuacuajani.

9

Quinto trompeta jonesacari

¹ Na nuhuaji, quinto Pueyaso seruuri na trompeta joneneree. Jiyacaritij, janiyari jiyocuacaanuji jiyocua tinio rijia niquiriini. Cuno rijiaari tiotiu riatataja niqitiosaaree, puequetuuju raa na riatanura. ² Na riatasacari, najacaari nojooma juhua puereetuca cuhuariquia sesacari. Pananu namijia tiomaari. Jiya cajiniocuaari mueruucara quiquiijuhuj. ³ Sequeruuri cuno najacajiniji mueratumaa. Puetunu nio jiyacuajanaa paaquemaari. Sequeruuri cumaaca niqitiosaaree nojuaraca na quiniuria juhua turucuanini. ⁴ Sequeruuri rootasaaree maja nojori miaquenura jiyasocua, nacuhua jaamasujuhuj,

puetunu moritijaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapue te na jiniji jirioyaquishoo quiriquiaa Pueyaso sesatacuajani. ⁵ Sequeruuri rootasaarejuhuaj, maja nojori cusojuanura pueya. Cinco raca cuaara nojori shocojoora cutara, pueyaracaanu sequeru saashi noosacari. Cuno sequeru saashiiri juhua turucuaniniu saashi noonutaniya.

⁶ Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutiani-yari. Jiyanhua na shaajenu panishacari juucua, nojori-iri saaja rishiniutianiya, jiyanhua naquiya nojori mi-ishacari.

⁷ Sequeruuri puereeta niquishano quiriquiaa juhua miaquetojonura jeenucuasano caballohua. Sequeruuri casaa jiitariquiaa na nacajinia juhua jiyaniijianucua oraajini shipinijosano nacaqueya. Nojori jiquicoori juhua pueyano jiquioco niquishano quiriquiaa. ⁸ Nojoriiri juhua maaji muecacaraca quiriquiaa, tucamuejaru-juri. Juhua juurunu sare quiacaraca quiriquiaajaariuhuj.

⁹ Nojori jiriquiaqueeri cumueeca quiriquiaa juhua turtuco. Nojori jaacuatusacari, na nesuhuari jiyanhua cojutuneriquiaa juhua caballohua jayotasacari queraatia rucanejotaruhua, miaquetojonuucua na netecuatusacari.

¹⁰ Cuno sequeruuri juhua turucuaniniu nojuacaraca quiriquiaa. Jiyanhua noonacuracajuhuj. Jaara nojori saare, cunoori quiquiaari nojori na noonura cinco raca.

¹¹ Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuujuu raa camarujaariuhuj. Hebreo rupaaajinia, na sesaari "Abadón". Griego rupaaajinia saniniuuujia "Apolión". Pueyano rupaaajinia saniniuuujia, nioori sequeya "Pueya Puecoona".

¹² Janiyari naa niquitishaareni taa coteenujanaa naquiya miishaanu quiniutianiya, cuno jiuujianaraca

naquiya miishocoriquianojiniji. Socua caapiquiiri cureyaja na nuhuajiria.

Sexto trompeta jonesacari

¹³ Sexto Pueyaso seruuri na trompeta joneneree. Janiyari jiyacari rupaa tojirii pocuaanoni, shanohua jaanutaja catijiaja juhuacutu cuatro tuhuajaa tajiniji, Pueyaso tacoji nujuatajani, orojiniji shipinishanoni. ¹⁴ Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetucua Eufrates moo shuriucua morojosano quiyani.

¹⁵ Jiyacaritij, cuno cuatro Sesaaca seyari samaacarojosaaree jyanohua queraatia pueya nojori puecoonura, quera na cajiniocua puetunu mijiria quiijaca pueyajinijiojuanaa. Cuno Sesaaca seyari tariucuacaanu nao morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijiara. ¹⁶ Janiyari tojiriini cuno cuatro Sesaaca seya soldadohuari, doscientos millones pueya quiriquiaa saa caballohuaracaja.

¹⁷ Janiyari cuno caballohua niqitishaaree juhua cua maquenujiniani, na nijinia cajituniaanio. Jyanohua tamaatia niquishano quiriquiaari. Puetunu nojori jiriquiacajanaari turtucujiniji shipinijosano casaata mishiquijosano quiriquiaa. Cuno, nojori naatiyaquishaanuucujaji nojori cushiyosano turtuconi, cunoori puereeta niquishano quiriquiaa; naatuuca juhua mani, nentuuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufreno. ¹⁸ Cuno jiuujianaraca puereeta casaata quera na cajiniocua puetunu pueyajinijiojuanaari cusojuasaaree.

¹⁹ Naacujitij, caballohuari cumaaca jiitariquiaa na rupaama, na pitijiniujuhuj, nojori puecoonura pueya. Na pitucuaari juhua sacocua niquishano quiriquiaa. Juhua sacocua nacacaraca quiriquiaajaariuhuj pueya na sajitiajara.

²⁰ Cureeno pueya, canapueete maja na puecoosaanu quirii cuno jiuujianaraca puereeta casaatani, nojori-iri sesa miiniu tarinitiaaquiriquiaa saaja. Nojoriiri samaruhua secojonu tarinitiaaquiriquiaa. Naajuhuj, nojoriiri orojiniji shipinijosano casaa shuquiritariquiaa Pueyaso niti, platajiniji shipinishano, broncejiniji, saaji-ajinijijuhuj, macajinijinio. Puetunu cunojuanaa, nojori jiyatesano tama na pueyasohuarajaajani, cunoori maja na niquiniu. Majaari na tojiniu. Majaari na rucuanenujuhuaj. ²¹ Naajuhuj, majaari pueya tarinitianu quiriquiaa narta pueya monu, shimiojonujuhuj. Naajuhuj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuj. Nohuasejonu tarinitiatuayaquiriquiaajaariuhuj.

10

Pueyaso seru mueetasano tucuanee naajioneeniyujuajiniji pohuatasano

¹ Na nuhuaji, janiyari socua tamonu jiyanoehua cumaacaraca Pueyaso seru niquirii jiyocuacaanuji roseyanoni. Cohuaja najacajinia cuhuajaatiariquiaari. Na nacaacua camarucuteriquiaa naashiiri. Na jiquiocoori jiyanoehua shacantuuca quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuua na noshishacaritij. ² Na miaquetajara mueetariquiaa shiitaniyujua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacuaari. Tacujua niaree nio jiyacua saniniuurijia. ³ Nocua na nujuasacari,

jiyanohua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. ⁴ Cuno siete miacana pocuanu nuhuaji, janiyari na sequesano naajiotanu paniriquiaa tari juucuaní. Jiyacaritij, janiyari tamonu rupaa tojirii jiyocuacaanuji naa cua sequeyano saajani:

—¡Maja pueya niishitiniu cuno siete miacana sequesano! ¡Maja na naajiotanu! Tama quioojiajiniaaja quia racatare.

⁵ Jiyacaritij, Pueyaso seru cua niquishano shoniniacu caminiaacua nujuaanoni, nio jiyacuajuhuj, nojuajaari na miaquetajara na juaashiquia shiitioree jiyocuacaanu, seetanujuanaa na sequenura. ⁶ Naa sequereeri:

—Cuno, pueyaracaanu Quijiani, nojuajaari jiya cajiniocua shipininia, jiya shipininia, shoniniacu caminia shipinijuhuj, puetunu tii quijiaca casaajanaa shipiniano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. ⁷ Séptimo Pueyaso seru coteesacari jonenenu na trompeta, cuno juucaja, puetunu jiyasohuaja Pueyaso miiniu panishanojuanaari tari tohuateesano quiniutianiya. Naa quiniutianiyari taa na pohuataquiaari na sequenu panishano caminiujiuniaa pueyacuajani”.

⁸ Cua tojishano rupaa jiyocuacaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacua nujuaani, jiyacuanio. Nojuaja quia masetasee cuno riatasano naajioneeniyojua, na mueetaani.

⁹ Janiyari Pueyaso seruucua quiaareeni. Janiyari na sequeeseeni na naajioneeniyojua na niqutionura janiya. Cua riucuaareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuuriija. Cunoori, pueya na saniitotaja rupaa na quiniuucua.

¹⁰ Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaque-reeni. Seetanujuanaa shoqueeca quiriquiaari juhua samiyatu. Cua miasacari, cua seecojinia jatasee pi-iquiaraari. ¹¹ Jiyacaritij, janiyari naa sequesaa-reeni:

—Quiocua Pueyaso sequesano caminiujiuriohua pohu-atanu queraatia pueyapue niquiara, queraatia tamaa-tia jiyacajinia quiniaa niquiara, queraatia tamaatia ru-paaca pocuajaca niquiarajuhuj, queraatia jiyaniijianucua niquiaranio.

11

Caapiqui Pueyaso sequesano caminiujinua miishanojiniji pohuatasano

¹ Na nuhuaji, janiyari tia shanacujutaja naajua niq-uitiosaareni, juhua nataca niquishano. Janiyari naa sequesaa-reeni:

—Quiarjia cutara quia quiaare Jerusalén tiacajinia. Tii nujuataja Pueyaso Secojojua tia quia shanacujusee quia shanacujutajata, orojiniji shipinishano shanohua jaanu-taja catijiajanio. Quia serojorejuhuj puetunu Pueyaso secojonuujuacajanaa tii. ² Maja cutaraari quia shanacu-junu Secojojua tia carijiniacuma. Cunocujaari tau-cuaca niqitiosaarucuaa tari. Pueyaso soojeaca taucua-caari Pueyaso saquiriojosano na tiacarano jiiitianutaniya pueyaracaanu, cuarenta y dos raca cuaara na shocojore-jaatijia. ³ Janiyari caapiqui cua saquiriojosano pueya jiyaronutaniyani, janiyajiniji nojori pohuatanura pueya niquiara. Nojoriiri janiyajiniji pohuatanutaniya cuaara shocojorejaatijia mil dosciento sesenta juuca. Nojori-iri cocuaque toqueya cushiniutaniya taa pueya cushiy-oquiaacuajani nojori taraajesacari.

⁴ Cuno caapiqui janiyajiniji pohuatanaani, nojoriiri cuno caapiqui olivo naana, tariucuacaanu Pueyaso Rupaajinia pohuatashiyacuajani. Naajuhuj, nojoriiri cuno caapiqui samari nujuatacojua, Jiyaniijajanaa tacoji nujuatacojuani. Cuno, nojori Jiyaniijiani, nojuajaari jiya Jiyaniijajuhuj. ⁵ Tamonu jaara sesa miiniu paniri cuno caapiqui pueya, nojoriiri na paraa catijanutaniya nojori rupaamaji mueranacujua manitia, nojori na puecoonura. Nojoriiri saaja naa cusojuanutaniya noo pojori, canapueete nojori miiniu paniya sesa juucuacuajani. ⁶ Nojori, janiyajiniji pohuatanaani, nojoriiri cumaaca jiitianutaniya maja na nitiniuria maru pueyaracaanu mijiria nojori pohuatasacari Pueyaso rupaa. Naajuhuj, nojoriiri cumaaca jiitianutaniya mohuaca na jataniniuria nanacara. Nojoriiri cumaaca jiitianutaniyajuhuj nojori sesonura jiya puetunu puereeta tamaatia casaatajanaa. Nojoriiri pueyaracaanu naa miijonutaniya nojori panishacari. ⁷ Nojori jaara janiyajiniji pohuatanu tucuatate, jiyacartij, puequeetuuju raamaji tohuatariquiiano pueresano sacuaraatia Casaani, cunoori nojori paracaaniutaniya. Nojori shocotanutaniyari. Naacuajitij, nojori puecoonutaniya socuari. ⁸ Nojori queteeri cuno puereetuuca niishishano tiaca nuucuajinia pojoconutaniya, tee nojori Jiyaniijia mosaaquiaari niyacutesanojinia teetesanocujani. Cuno tiacaari miriqui jiyaniquishiya Sodomata, Egiptotanio. ⁹ Naacuajitij, jiuujianaraca juuca, socua niquiriyatu juuca cajiniocuanio, queraatia tamaatiuucua pueyari nojori quete shootianutaniya. Naa nojori queteya shootianutaniyari queraatia tiquiyocua tiacajinijinio pueya, tamaatiuucua rupaaca pocujaca pueyajuhuj, queraatia tamonu jiyacajinijinio pueyanio. Nojori paraari maja na shanacunu quiniutaniya nojori jamojasaanura. ¹⁰ Puetunu mijiria quiniaajanaari shuquiriutiuniutaniya, macunucua cuno caapiqui Pueyaso sequesano caminiujiunaa quishacari. Pueyari jiyanohua tim-

iquionutaniya, naquiya nojori miitajaca puecoosaanuucua. Naaratej, mijiria quijiacaari tama na casamijinjijiaaja nareja niqitiojotoonutaniya nojori shuquiriniutia.

¹¹ Naajaa, jiuujianaraca juuca, socua tamonu juuca cajiniocua nuhuaji, Pueyasoori nojori samiitiani-jiorohua. ¡Nojoriiri na matusaquiiji saneecuaturohua! Puetunu nojori niqiniaajanaari jiyanoehua shiriiqitii.

¹² Jiyacaritij, cuno caapiqui Jesucristojiniji pohuatanaari puereetuca rupaa tojitiirii jiyocuacaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niqiara tacataquee cohuajajinia jiyocuacaanura! ¹³ Na paraa shootiasacari nojori, jiyacaritij, rijiaari jiyanoehua jiuuquiujiutiaree. Naa rijia jiuuquiutiasacaritij, Jerusalén tiacajinia queraatia tiacaari niyarequetaquee. Siete mil pueyari tii cusonuree. Cureeno pueyari jiyanoehua jiuujiateree Pueyasooeaji. Nojoriiri jiyacari niishirii Jiyocuacaanu Quijiaari seetanujuanaa Pueyaso cutara.

¹⁴ Janiyari naa segundo naquiya miiniu niqitishaaree-jaaniuhuj, taa na nuhuaji na miishaanutaniyacujani. Tercero naquiya miishacariiri quera ritia cuno nuhuajijia quiniutianiya.

Séptimo trompeta jonesacari

¹⁵ Séptimo Pueyaso seruuri na trompeta joneneree. Jiyacaritij, puereetuca rupaacaari jiyocuacaanu tojishaaree. Naa sequeturiquiaari:

—¡Quiarrijiani, pa Jiyaniijia Pueyasoori tari jiiitianutaniya puetunu jiyacua jiyaniijianucua jiiitiasanojuanaa! ¡Nojuajaari pa Jiyaniijia Cristota Jiyaniijianucua-janaa quiniutianiya! ¡Nojoricuajaari pueyara-caanu Jiyaniijiajanaa quiriquiano!

¹⁶ Jiyacaritij, cuno veinticuatro niishijiaca jiyaniijianucua, shanohua cajitiujinia cajitiuriquiaa Pueyaso tacojini, nojoriiri Pueyasoocuara jacamaturee jiyanhua na shuquiritianuta nojuaja. ¹⁷ Naa sequeturee Pueyasoori:

—¡Paacarasho canaa Jiyaniijianaa! ¡Quiaari puetunu cumaacaracajanaa! ¡Quiaari quijiajuhuanajaj! ¡Quiaari pueyaracaanu quijia! ¡Quiaari tari juhuacatecara quia cumaaca poonijioteree, Jiyaniijajanaa quia quiniuria pueyaracaanu! ¹⁸ Cunora, puetunu jiyacua jiyaniijianucujajanaari juaaquioya. Naajaa, quiarijiaari quia juaashacari cutara. Quiarijiaari macunucua quia nequesoreenu juucajuhujaj. Saniniuujia, quiaari pueyara quia sequesano caminiujiuniana pueya niqutiojonutaniya nojoririano quia riuriotaca, puetunu quia saquiriojosano pueyajanaajuhujaj, puetunu quia timitiajaca pueyajanaanio, jiyaniijianucua, narejaca pueyanio. Naajuhujaj, quiaari jiya sesojuaca pueya shaajanutaniya.

¹⁹ Jiyacarijuhuaj, jiyocuacaanu Pueyaso Secojoua tiaari riataaaree. Janiyari Pueyaso Quishaquijianaa niquiriini. Tii matariquiaari Pueyaso caaja, seetanujuanaa na Rupaajanaa na racataja. Cuno na Rupaari na pueya na jyanootiaja, na tojiyashijiaca na saniitiotajajuhujaj. Jiyacaritij, miacanaari nunujuree. ¡Jiyanhua majacureeri! ¡Puereetatej, jiyanhua cojuata! ¡Rijiaari jiyacari jiuuquiutiaree! ¡Jiyanhua queraatia miacanajaa shiniitijuiaacaari juhua maru totereejuhuaj! ¡Jiyanhua puereetaari quiriquiaa!

12

Miriqui pohuatasano maajjiniji, puereetuca Naaqueru-jinijijuhuaj, juhua cohuaniquia niquishano

¹ Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, cua niquishanoni. Juhua toqueta pananujinia cuhuajaa-tiariquiaari. Racaacua nujuariquiaari. Doce riyari na nacaque quiriquiaa. ² Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari. ³ Jiyacaritij, janiyari socua tamonu casaa niqutishaaree jiya cajiniocuani. ¡Puereetuuca Naaqueruuri quiriquiaa, naatuhuana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracanio. Jiyaniijianucua shipinijosano nacaqueya niqutiacoriquiaari na siete nacaacua. ⁴ Cuno naatuhuana Naaqueruuri quera na cajiniocua riyajinijinio nocuara rerecoree jiyocuacaanuji na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. ¡Na sashiriquiaari cuaara raara, mueya na mianura jaara rasaare! ⁵ Maajiiri cayaniyoyua raree. Nojuajaari puetunu mijiria quijijaca pueyapuejanaa Jiyaniijijajanaa quiriquiano. Nojuajaari pueyaracaanu na maca mueturiquiano, na tojiyashijijaca na piyotajara. Mueyari na nucua jaariutiasaaree Naaqueruucujaji. Pueyasoori na shuriucuaara na ririi, tii na cajitiniuria, Jiyaniijia quiriquianoni. ⁶ Maajiiri saniniuujia cariiquia jiyajinia mashirii, tee Pueyaso jeenucuaquiaari tari nocujaji na quijiaracuajani, tii na mianuutesaanurajuhuj, cuaara shocojorejaatijia mil dosciento sesenta juuca.

⁷ Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhuj puetunu na seyatajanaa. Puetunu nojorijianaari puereeta quiaquetooriguiaa jiyocuacaanu. Cuno Naaqueruuri na seyata jiyanoehua quiaqueriquiaa Pueyaso seya juucua. ⁸ Naajaa, majaari nojori naata quiriquiaa Pueyaso seya shocotanu. Pueyaso seya paracaaniuucua jiyanoehua nojori, majaari quiquio quiniu quiriquiaa socua

nojoriria jiyocuacaanu. ⁹ Naacujitij, cuno Naaqueruuri jiyocuacaanuji taanuusaaree. Nojuacuajaari cuno tari-ucuaaanu Soconu, Eva sapojoquiaarini. Cuno Sesaaca seque sesaari “Satanás”. Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaaree.

¹⁰ Jiyacaritij, janiyari jiyocuacaanu quijiaca queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa sequeturiquiaari:

—¡Pueyasoori parta Pueyaso pueyacuara Saquiriojotana jatatee tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jataaanuucuatej, Pueyasoori quiarijia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jiiitianutaniya pajaniya, jiyanohua na cumaacata! ¡Pa Jiyaniijia Cristoori tari jiyatesaaree Jiyaniijiajanaa na quiniuria! Naa na miishaanuni, cunoori na Que saquiriojosano na quiniuucua. ¹¹ ¡Pueyaso Borrego na quiniuucua, nojuajaari na nanaca shootequiaari, tojetaarucua-janaa jiyanooshano pa quiniuria sesa pa miishano-jiniji! Naacujitij, Satanás saquiriojotasacari parta Pueyaso pueyacuara, nojoriiri na sanaajaquiaari nojori tiuuniuucua Jesucristoocua. Nojoriiri na shocotaquiaarijanaa, nojori pohuatanuucua Jesucristoocua nojori tiuuniujiniji. Nojoriiri maja na puerenu quijia na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. ¹² ¡Naaratej, jiyocuacaanunaa, shuquiriaatia quia quiri! ¡Naa Sesaaca jataaanuucuatej, nia timiquiore jiyocuacaanu quijiacanaa! ¡Niajaniya saniniuujia, jiyacua

quijiacanaa, shoniniacu caminiajinia quijiacanio, jiyanhua nia taraajere! ¡Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jiyanhua na juaaniutia!

¹³ Cuno puereeta niquishano Naaqueru niishishacari nojuaja tari jatasaaree jiyocua, nojuajaari cuno mueya nucua neteyojotanu coteeree na mianura juucua. ¹⁴ Cuno maajiiri querajaa puereetuca nesu niquitiosaaree saaja, juhua jiyanhua puereetuca surohua miooru nesu. Cuno nesuta, maajiiri na quiquiojiniara jaaree cariiquia jiyajinia, tucuacaanu cuno Naaqueruucujaji. Tii mi-anuutesaanutaniya pueyaracaanuuri cuaara na shoc-jorejaatijia jiuujianaraca marijia, socua seis racanio. ¹⁵ Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. ¹⁶ Jiyari maaji naacutaree. Jiyari juhua na rupaa riataree. Naaqueru rupaamaji pojuaretaano moo raturee saajaari. ¹⁷ Naaqueruuri jiyamitia maajiicua macaarii jiyanhua. Quiaareeri maajiicujajinio supueno pueyata miaquetojonura. Cuno pojoricujajaari Pueyaso rootasano tojitiajaca, canapuete Jesucristoocua nojori tiuuniu seetaashijiacacuajani.

¹⁸ Naaqueruuri shoniniacu caminia casaqueyaji nujuasee.

13

Caapiqui puereeta niquishano Casaajiniji pohuatasano

¹ Na nuhuaji, janiyari puereeta niquishano Casaa niquirii shoniniacu caminiajiniji tacaanoni. Siete nacacaraca quiriquiaari, diez nacajaaracanio. Puetunu na diez nacajaacua jiitiariquiaa jiyaniijianucuaara ship-inijosano nacaqueyari. Puetunu na nacacaacujanaa, sesacaari nocua naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa,

juhua Pueyaso shocotaja na quiniuucua. ² Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari juhua oso niohuaca niquishano quiriquiaa, tucuaocua juaashococaraca. Na rupaari juhua juurunu sare rupaa quiriquiaajuhuj. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitioree. Tama na cajitujiniaaja na cajitiriiri jiyaniijajanaa na quiniuria jiyacua. ³ Cuno puereeta niquishano Casaa siete nacacaracani, niquiriyatu na nacacajinijinioori pishano quiriquiaa na mosaanura juucua. ¡Cuno puereetuuca piyashi na nacaacua quiriquiaani, saaja cushiriiquiri! Puetunu mijiria quiniaa pueyajanaari jiuujateree na cushiriishacariuhua. Cunora, puetunu nojorijianaari cuno puereeta Casaa tojijiacara quirii. ⁴ Jiyacaritij, mijiria quiniaa pueyari cuno naatuhuana Naaqueruucuaara jacamaturee juhua Pueyasooacara, cuno puereeta niquishano Casaa na jiyatenuucua nojori jiyaniijajanaa na quiniuria. Pueyari cuno siete nacacaraca puereeta niquishano Casaacuaara jacamatureejuhuj. Nojoriiri na sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetoojonura? Shaaqui.

⁵ Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasooacara, Pueyaso na rerequetenurajuhuj. Naa miiriiri na jiyaniishacari nojuajaari socua maninia quijia Pueyasojiniji. Naajaa, nojuajaari jiyaniijiaara jiyatesaaree saaja cuarenta y dos racara. ⁶ Naacuajitij, cuno puereeta niquishano Casaari Pueyaso rerequetenu coteeree. Pueyasooacara rimi-aquereeri. Jesuucua tiuujica pueya sesacareejaari-uhuj, jiyocuaaanu Pueyaso quiquionio. ⁷ Mijiria quiji-

aca Pueyaso saquiriojosano pueya paracaatishaareejaariuhuj. Cumaquishaareejaariuhuj Pueyaso pueya na shocotanura. Cumaaca niquitiosaareejaariuhuj jiyani-ijajanaa na quiniuria, puetunu tamaatiuucua pueya-puejanaa na jiitianura, puetunu tiqiyocua tiacajini-jinio pueyajanaa, puetunu tamaatia rupaaca pocujaca pueyajuhuj, puetunu tamonu jiyacajiniajanaa quijiacanio. ⁸ Naacujitij, puetunu mijiria quijiaa pueyajanaari cuno puereeta niquishano Casaacuara jacamaturee na shuqiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jitianasano naajioneejinia, cante pocuara mosaaquiaaricujani. Pueyaso muerasu sesaca cutaraari cuno naajioneejinia naajiotasaaquiaari jiya shipinishaacarijiyojua, pueyaracaanu rishijiaa pa quiniuria.

⁹ Cante numaacarani, nojuaja cuara tojiiria nio: ¹⁰ “Cante Pueyaso jiyatesano quiasocoriquianoni, nojuajaari seetanujuanaa quiasano pueyano quiniutianiya. Naajuhuj, cante nijiniaquetucujaja mueruuta mosocoriquianoni, seetanujuanaa naa mosaanutaniyari”. Naaratej, Pueyaso pueya cuara puetunu casaajanaa rejeretajaca quiriia, seetanujuanaa nojori tiuushacari Pueyasooocua.

¹¹ Na nuhuaji, janiyari tamonu puereeta niquishano Casaa niquirii jiyajiniji muetaanoni. Caapiqui nacajaraca quiriqiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariqiaari. ¹² Jiyanojua cumaacaraca quiriqiaari, juhua narta puereeta niquishano Casaa, teyano naca pishanotucujaja cushiriiriohuani. Nojuajaari na naca cushiriiniohuana narta puereeta niquishano Casaa naacuriquiaa. Naacujitij, nojuajaari puetunu mijiria quiniaa pueyajanaa mojoquetanijioree juhua Pueyasooocua, nojori timitianura

na naca pishano cushiriiniohua puereeta niquishano Casaa. ¹³ Naajuhuj, nojuajaari na cumaacata miiri jiyajeneta casaa pueya jiuujiatenura nocuaji. Jiyanoehua cumaacaraca na quiniuucua, pueya niquiara, nojuajaari mani tinirii jiyocuacaanuji jiyocua. ¹⁴ Naa na cumaacata na miiniuucua cuno na naca cushiriiniohua puereeta niquishano Casaa tajojitij, puetunu mijiria quiniaa pueyajanaa sapojoreeri. Naacujitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samiitiarohua saajacujani. ¹⁵ Jiyacaritij, nojuajaari cumaaca niquitiosaree pueya shipinishano Casaa na jiyatenura saminiora, pocujara na quiniuria, nocuara jacamatiuyashijiaca na puecootenurajuhuj. ¹⁶ Naajuhuj, cuno caapiqui nacaraca puereeta niquishano Casaari na pueya sequeree nojori naajiotanura puetunu pueyacuajanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacujitij, puetunu mijiria quiniaa pueyacuajanaa naa naajiotasaareeri, tojiyaquishoo pueyacua, tojishano pueyacua, casamiriaca pueyacua, casamijiuniucua pueyacua, tama nojoriria poonijionuujuacajaaja pueyacuajuhuj, poonijiotasano pueyacuano. ¹⁷ Jiyacaritij, canapueete cuno puereeta niquishano Casaa sesa naajiotasano jitiaaquiriquiaa na cuaqueyacuani, nojoriiri maja na naata na panishano masenu quiriquiaa na cumanecata. Naajuhuj, majaari nojori naata na casami niquitijonu quiriquiaa na cumanecara. Pueya jaara cuno puereeta niquishano Casaa sesa jitiaaquiri naajiotasano na cuaqueyacua, na naata na sesa número jitianu nocua naajiotasano.

¹⁸ Nio niishishaanura maninia, jiyanoehua niishitiajaari

panishiya cutara. Niishijiaca pueya cuaara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacuajuhuj!

14

Borrego Niquiojua cojiniaajiniji pohuatasano

¹ Na nuhuaji, janiyari Borrego Niquiojua niquiriini, Sión tuhuananuucua nujuaano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuj. ² Na nuhuaji, janiyari casaa tojirii juhua sararojua cojuatuneyano jiyocuacaanujini, juhua miacana majacuyano, juhua queraatia pueya arpa taquin-ionuyanojuhuj. ³ Cua tojishanoori quiarinio jaaquequejosano quiriquiaa. Jaaquequenuunaari Pueyaso cajitiu tacoji jaaquequenuuriquiaa, cuno cuatro saminio casaa tacojijuhuj, cuno veinticuatro niishijiaca jiyani-ijianucua tacojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quiniaajinijinio saquiriojosaaquiaari Pueyaso pueya nojori quiniuria. ⁴ Nojoriiri tojetaarucujanaa maaji numuetuqueyashijica quiquiaari, saaja pocuaji Tacunaacua jiaatijaca nojori quiniucua. Naaratej, tiqiyocua Borrego Niquiojua ru-cuanejosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniurijuhuj. Nojoriiri socua Pueyaso timitiasano pueya puetunu Pueyaso saquiriojosano pueyajinijinio-juanaa, taa pa shuquiritiaa shushajanaa pa carojosano

pa nataujinijicuaani. ⁵ Nojoriiri tojetaarucujanaa sapo-
jonu niishiyashijiaca quiquiaari, tojetaarucujanaa sesa
miyashijiaca nojori quiniucua.

Jiuujianaraca Pueyaso seya pohuatasano

⁶ Na nuhuaji, janiyari tamonu Pueyaso seru niquirii
jiya cajiniocua jaanoni. Jaariquiaari mijiria quijiaca pueya
niquiara na pohuatanura Pueyaso Rupaa, puetunu jiy-
acajinia quiniaa pueyarajanaa, puetunu tamaatiucua
pueyapuerajanaa, puetunu tamaatia rupaaca pocujaca
pueyarajanaajuhuj, puetunu tiquiyocua tiacajinia quiji-
aca pueyarajanaanio. Na pohuatasanoori seetanu rupaa-
janaa pueyaracaanura. ⁷ Pueyaso seruuri mijiria quiniaa
pueyacua nacariquiaa naatej:

—¡Pueyaso puerejaca nia quiriquia! ¡Nojuaja nia
maniniuhuaqueetare! ¡Quiarijiaari na nequesoreesacari
pueya! ¡Nocuara nia mojuquetacore nia shuquiritia-
nura nojuaja! ¡Nojuacuajaari jiyocuacaanu shipinia,
nio jiya, puereetuuca shoniacu caminiajuhuaj, puetunu
samocua nacaca pacartacojuacajanaanio!

⁸ Jiyacaritij, tamonu Pueyaso seruuri narta Pueyaso
seru nuhajimiaajuhuj. Naa miriqui sequeriquiaa Roma
tiacajinijiiri:

—¡Babilonia tiaca tari saniitioshiya! ¡Cuno puereetu-
uca tiaca tari saniitioshiya! Babilonia tiacaari puetunu
jiyacajinia pueyajanaa niishitiojua, sacuaraatia nojori
miiniuria juhua nojuajuhuj. Babilonia tiacani, nojuajaari
puetunu sesa casaa na miiijosanotajanaa juhua mashaase-
quetejoquiaari puetunu mijiria quijiacajanaa. Naacua-
jitij, puetunu pueyajanaari tama na cuaqueya miiniu
panishanojuaja miijiacara quiquiaari, jiyanohua nojori
jiaatianuta sacuaraatia casaa na miiniuria, taa Babilonia
tiacajinia quiniaa miijioquiaacuaani.

⁹ Na nuhuaji, socua tamonu Pueyaso seruuri narta caapiqui na puetanaa Pueyaso seya nuhuajimiaajuhuj. Mijiria quiniaa pueyacia nacaree naari:

—¡Jiyanohua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojoquetacojua juhua Pueyasooocarani! ¡Jiyanohua puereeta quiniutianiyari noo pojoririajuhuj, canapuate juhua na naca cushiriinohua niquishano shipinishano Casaacuara jacamatujucani! ¡Naajuhuj, puereeta quiniutianiyari noo pojoriria, canapuate na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj! ¹⁰ ¡Pueyasoori puetunu cuno pueyajanaa saniitionutaniya jiyanohua na juaaniutia! ¡Majaari quenaaja Pueyaso jiuujiaaniu quiniutianiya nojori! ¡Pueyaso seya niquiara, Borrego Niquiojua niquiarajuhuj, nojoriiri pueyaracaanu naquiya miishaanutaniya manitia, azufretanio! ¹¹ ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori, canapuate na naca pishano cushiriinohua puereeta niquishano Casaacuara jacamatujuaca juhua Pueyasooocarani, juhua nojuaja niquishano shipinishano Casaacuarajuhuj! ¡Naa miishaanutaniyajaariuhuj noo pojori, canapuate cuno puereeta niquishano Casaa sesa naajiotaniniutianiya tama nocuajaajani!

¹² Cunora, Pueyaso saquiriojosano pueyani, canapuate na rootasano tojtiajacani, Jesuucua tiuuniu tarinitiaashijiacajuhuj, nojori cuara juhuajaniya rejeretaara naquiya nojori miishacari.

¹³ Jiyacaritij, janiyari rupaa tojirii jiyocuacaanuji naa

cua sequeyanoni:

—Nio quia naajiotare: “¡Quiarijiani, jiyanhua shuquiriaatia quijiaca cutaraari cuno macunucua, canapuede tariucua Jiyaniijia Jesucristoocua tiuuijaca cusonuunutaniyani!” Pueyaso Sohuanuuri naa sequeyajuhaaj: “¡Taaquiriirinij! Nojoriiri samaateya, pueyaracaanu na Jiyaniijiaara na poonijionuunu nuhuaji. Maninia nojori miishanocuaajaari niyajetaaquishaanutaniya. Cunora, nojoriiri maninia miishaanutaniya”.

Pueyaso seya senoosacari pueya juhua nataacuaca nio jiya-jiniji

¹⁴ Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijiaara shipinishano nacaque cushitariquiaari, orojiniji shipinishano. Nataacuaca na senotajara shamaticuaja jacatunee mueruu mueruriquiaari. ¹⁵ Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jiyanohuari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacacuaajaari tari noshuriujua! ¡Cuaara quiarijia senoosaaria!

¹⁶ Jiyacaritij, cohuaja najaca caco cajiyanoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

¹⁷ Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamaticuaja jacatunee mueruu mueruriquiaajuhuaaj.

¹⁸ Na nuhuaji, socua tamonu Pueyaso seruuri tohuatamaa Pueyasocuaara catijiaja casaajiniji. Nojuajaari mani camaru. Nojuajaari narta Pueyaso seruucua nacaree, shamaticuaja mueruu mueruyanoocua. Na sequereeri:

—¡Quia shamatucujaja mueruuta uva quia carojotare, jiyajinia moritiaconuni! ¡Tari noshuriujuacuaja!

¹⁹ Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijijianaa. Uva jaapuejoree saajajinia quejasano puereetuuca surocohuamaari. Pueyasoori tii na rapijiotenutaniya jiyanoehua na juaaniutia. Cuno uvani, nojoriiri Pueyaso ruuretajaca pueyacuaja. ²⁰ Cuno uvaari rapijiosaaree tucuacaanu naata tiacajiniji. Uva rapijiosaquiji, nanacaari tojetaarucujajanaa jaateriquiaa juhua mohuaca. Jiyanoehua nanaca quiniuucua, cabollohua rupaacuma puecariquiaari. Pueyaso tojiyashijiaca pueya nanacaari jiyanoehua tucuacaanu jaateree juhua moo. Tresciento kilómetro jaatereeri.

15

Siete Pueyaso seya, siete naquiya miitiaja na mueetacosacari

¹ Na nuhuaji, janiyari jiya cajiniocua socua niquitishareeni, cua niishiniuria taa mijiria quiniaa saniitiosaanu tucuatasaanutaniyani. Cua niquishanoori jiyanoehua puereeta quiriquiaa. Janiyari nocuaji jiuujiatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucuatanutaniya puetunujanaa.

² Janiyari casaa niquiriijaaniuhuj juhua puereetuuca caminia motiiquojiniji shipinishano. Manitia cojitiishanoori quiriquiaa. Pueyari cuno caminia shocua njuaturiquiaa. Nojoriiri noo pojori quiriquiaacuaja, canapuate na naca pishano cushiriinohua Casaa shocotaquiaaricujani, juhua nojuaja niquishano shipinishano Casajuhuj. Naajuhuj, nojoriiri maja na shanacunu quiquiaari cuno

Casaa sesa naajiotasaanura nojoriicua. Puetunu no-jorijianaari Pueyaso niquitiojosano arpaa taquinionu-uriquiaa. ³ Nojoriiri Pueyaso seru Moisés jaaqueque-josano jaaquequenuuriquiaa, Borrego Niquiojua jaaque-quejosanonio. Nojoriiri naa jaaquequenuuriquiaa:

—Jiyaniijianaa, puetunu quia miishanojuanaari jiyanohua maninia, nocuaji jiuujiatesano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijiaca pueya Jiyaniijajanaa. ⁴ ¡Quiaari pueresano, Jiyaniijianaa! ¡Quiaari tojetaarucujanaa maniniuhuaqueetasano seetanujuanaa! ¡Saaja quiajaniya cutaraari tojetaarucujanaa maninia miijia pueyara-caanu! Naaratej, puetunu jiyacajinijinio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhuj.

⁵ Naa cua tojinu nuhuajitij, janiyari jiyocuacaanu Pueyaso Quishaquijianaa niquirii riateyanoni, tee cuniqui seetanu Pueyaso rupaajanaa racatasano quiyacua-jani. ⁶ Cua niquishacari, cuno siete Pueyaso seyari Pueyaso Quishaquijianaa tohuareetariquiaa, canaputee cuno siete naquiya miitiaja patootariquiaacuajani. Nojoriiri tojetaarucujanaa cohuaja linojiniji toqueyaraca quiriquiaa, shacantuqueya. Nojoriiri orojiniji ship-inijiosano casaa na jiriquiacajinia camarucuteriquiaa. ⁷ Jiyacaritij, niquiriyatu cuno cuatro saminio casaa-jinijinioori miacojua niquitiojoree puetunu cuno siete Pueyaso seyajanaa. Cuno miacojuuari orojiniji ship-inijiosano quiriquiaa. Pueyaracaanu rishijia Pueyaso juaaquiacata mishinijiosano quiriquiaari. ⁸ Jiyacaritij, Pueyaso Quishaquijianaari maatia najacata mishiqui-imiaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuaara puecaarajaatijia naquiya nojori miitajaca

pueya. Cuno najacaari Pueyaso shacantuuca cumaacajiniji quiriquiaa, naa na saniitiojosacari na paraa.

16

Saniitionujiniji pohuatasano

¹ Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajiniji Pueyaso juaaquiaca nia taroosee jiyocua!

² Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jiyanohua nootuuca sapueyari pueyacia supueree. Noo pueyacia supuereeri, canapuate nocua naajiotasano jiitiri quiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara jacamatujuaca quiriquiaajuhuj. Jiyanohua nootujuaaca sapueyari quiriquiaa.

³ Segundo Pueyaso seruuri na miacojuajiniji Pueyaso juaaquiaca jaapuesee puereetuuca shoniniacu caminiajina. Mohuacaari puetunu nanacara quiquijianaa, juhua shusha mosano pueyano nanaca. Cunora, puetunu shoniniacu caminiajina quijia casaajanaari cusonuuree.

⁴ Tercero Pueyaso seruuri miacojuajiniji Pueyaso juaaquiaca jaapuesee puetunu moocujiniajanaa, puetunu samocua nacaca pacartacojuacajiniajanaanio. Jiyacaritij, nanacara jataquee puetunujuanaari. ⁵ Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhuanajaj. Majaari quia supuenu quiquiaari. Quiaari tojetaarucujanaa

maninia. Naa quia miitiasacari quia tojitiaashiji-acatej, quiaari seetanujuanaa maninia namirii nojori. ⁶ Nojoricuajaari quia saquiriojosano pueyajinijinio nanaca shootejoquiaari pueyaracaanu, quia sequesano caminiujiuniaa nanacanio. Quiaarjia saniniuujia, naa miijjaca nojori quiniuucuatej, quiaari nojori raatejoree nanaca. ¡Maniniacujaja Jiyaniijjanaa!

⁷ Jiyacaritij, janiyari Pueyasooacara catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijjanaa, puetunu cumaacacajanaa Pueyasonaa. Quiaacuajaari maninia saniitioree quia tojiyashijiaca, taa quia sequequiaari tariucuacaanu nojoricuajani, quiaari quia tojiyashijiaca saniitionutaniya. Quiaari seetanujuanaa sequequiaari quia miishocoriquiano. Quiaari puetunu sesa nojori miishanojuanaa niishijia.

⁸ Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jiyanoehua naseecara quiquii, pueya na catijianura juhua mani. ⁹ Naa pananu januucua jiyanoehua nasaatiatej, pueyari jiyanoehua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucuatej. Majaari quenaaja nojori pishiniu quirii sesa nojori miiniuujiniji, nojori taca-tonuhua noojia Pueyasooacara, nojori jiyaniijjara nojori jiyatenura Pueyaso. Pueyaso rerequeteturee saajaari.

¹⁰ Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriinioehua puereeta niquishano Casaa cajishaqui na jaapueseeeri, tee cuniqui juhua jiyaniijjajanaa na cajiriquiaacuajani. ¡Jiyacaritij, puetunu na jiitiasano jiyacajanaari ninishiquiria quiquii! Cunora, na pueyari

na niti saaquioriquiaa jiyanoehua nooeta naquiya na mi-
iquiosacari. ¹¹ Naa Pueyaso saniitiosacari nojoritij, naa-
jaa, majaari nojori pishiniu quiriquiaa sesa nojori mi-
iniujiniji. Nojori nootunenuucua, nojoriiri jiyocuacaanu
quijia Pueyaso sesacaree saaja, nootujuaaca sapueyaraca
nojori quiniucujuhuj.

¹² Cuno nuhuaji, sexto Pueyaso seruuri miacojuajiniji
Pueyaso juaaquiaca jaapuesee cuno puereetuuca Eufrates
moojinia. Moori joojequetaquee jiya pajamaji niriqiano
jiyaniijianucua niuutijara.

¹³ Jiyacarijuhuaj, janiyari jiuujianaraca samaruhua
niquiriini, juhua sacarohua niquishano. Cuno
samaruhuari tohareetariquiaa juhua cohuaniquia
niquishano naatuhuaana Naaqueru rupaamaji.
Tohareetariquiaajaariuhua na naca pishano
cushiriinohua puereeta niquishano Casaa rupaamaji,
narta puereeta niquishano Casaa rupaamajinio. Cuno
puereeta niquishano Casaari mijiria quiniaa pueya
sajoriquiaacuaja, nojori tojiniuria na naca pishano
cushiriinohua puereeta niquishano Casaa. ¹⁴ Cuno
jiuujianaraca samaruhuari cumaacaraca quiriquiaa, na
cumaacata nojori miiniuria nocuaji jiuujiatesano casaa,
pueya tiuuniuria nojori sequesanoocua. Nojoriiri naa
miiriquiaatej, puetunu mijiria jiyaniijianucujanaa nojori
rerejotenura. Jiyaniijianucuaari naa rerejotesaaree
nojori miaquetoojonura puetunu cumaacaracajanaa
quijia Pueyasota. Pueyasocuajaari tariucuaacaanu
niishiriojoquiaari naa cuno juuca na miaquetoojonura
nojoritia. Naa paniquiaaricuajaari na paraa na
puecoonura.

¹⁵ Jiyacaritij, janiyari pa Jiyaniijajanaa tojirii naa se-
queyanoni:

—Cua tojitiare cua pueyanaa. Janiyari canashiyaquiji
tiuquiniutianiuhuani nia niishiyaquishacari. Janiyari
naa niaacua tiuquiniutianiuhuani taa nohuasejua

tiuquiquiaa casami nohuasenuucuaaani, juhuajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secojosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tiuquishacarihua cararaatia juhua juhuasunucua quiri cua niqiiaraari.

¹⁶ Cua Jiyaniijia sequesano cua tojiniu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaajinia, nojori rerejosaqui sesaari, “Armagedón”.

¹⁷ Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuaaanu Pueyaso Quishaquijianaa Jiyaniijia cajitiujiniji, janiyari rupaa tojirii naa nacaanoni:

—¡Tari miishaaree puetunujuanaacuaaja!

¹⁸ Jiyacaritij, miacanaari nunujuree. ¡Jiyanohua majacureeri! Cojuataari quiriquiaa puereeta. Rijiaari tojetaarucujanaa jiyanohua jiuuquiujutiaree. Pueyano shipinishaanujiniji, majaari naa rijia jiuuquiujutianu quijia juhua nio rijia. ¹⁹ ¡Naa rijia jiuuquiujutianucua jiyanohuatej, cuno puereetuuca tiacaari neequere-setaquee! Jiuujianaracara raquitijiquiiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuuca Babilonia tiaca saniitioree, taa tariucuaaanu na niishiriojoquiaari cuno juuca na sanitationuracujani. ¡Jiyanohua na juaaniutia na saniitioreeri! Niya sequeshiya Babilonia tiacatani, cunoori Roma tiacacuaaja. ²⁰ Jiyacarijihuaj, puetunu shoniniacu caminiajinia jiya tucuaatiajacajanaari shaajequee, puetunu tuhuananuhujanaanio. ²¹ Naajuhuj, jiyocuaaanuji jiyanohua puereetujuaaca miacanajaa shiniitijiaacaari toteree pueyacua. ¡Noojiaqueyari jiyanohua niiquia quiriquiaa; cuarenta kilo! Mijiria quiniaa pueyari

Pueyaso sesacaree, naa nojoriicua na totinijianuucua shiniituijiaaca miacanajaatej.

17

Miriqui pohuatasano Roma tiacajiniji, juhua paanatu

¹ Na nuhuaji, cucua nimiaari niquiriyatu cuno siete Pueyaso seyajinijinio, canapueete siete miacojua patootariquiaacuajani. Cua sequeeseeri:

—Miji quia nimia. Janiya quia niquitiniutianiyani taa Pueyaso saniitionutaniya cuno Paanatuni, puetunu jiyajinia mohuacaacuajanaa cajiyani. ² Mijiria jiyaniijianuucuaari cuno Maaji numuetucujujuaca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacua quiniaa pueyajanaa. Naacua-jitij, nojoriiri sacuaraatia miijiacara quiquiaari, juhua nojuajuhuj.

³ Pueyaso seru niquitiniuria janiya na niquitiniu panishano, nojuajaari cua sohuanu jiyataare cariquia jiyajinia. Janiyari tii niquishii Maajini, naatuhuana puereeta niquishano Casaa nijinia cajiyano. Queraatia sesacaari cuno naatuhuana Casaa cuaqueyacua quiriquiaa, Pueyaso rerequeteja sesaca, juhua Pueyasora na jiyatesacari tama na cuaqueyajaaja. Siete nacacaracaari quiriquiaa, diez tuhuajaaracanio. ⁴ Cuno Maajiiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitija casaa cushitariquiaari: orojiniji shipinijosano casaa, shanohua sajiniji shipinijosano tiujiaujuhuj, noturu shipinijosano sajiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaraatia na miijosano casaatajanaa, numuetucujusaanu porocua na quiniuucua. ⁵ Na sesaari

miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanatujuuri nucuani, puetunu mijiria sacuaraatia miishanojuanaa coretanijiojua nucuano”.⁶ Maninia cua niquishacari, cuno Paanatuuri juhua mashaaseca quiriquiaa na puecootesano Pueyaso pueya nanacata. Nojuajaari jiyanojua timijia, Jesujiniji pohuatanaa puecoonu porocua na quiniucua.

Naa cua niquishacari nojuajatej, janiyari jiyanojua jiuujiatereeni.⁷ Pueyaso seruuri jiyacari cua sequeree:

—¿Casaara quia jiuujiateya nocuajini? Quiarjia quia pohuatareera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu cunojuanaari miriqui.⁸ Cuno puereeta Casaa quia niquishanoni, cunoori tariucuacaanujiniji quijia quiquiaari. Quiarjia saniniuujia, majaari tari na quiniu. Naajaa, quera tacanutanuhua cuno puequeetuujua raamajiiri, seetanujuanaa puetunujuanaa na shaajasaanuhua cutara. Pueyaso ruuretajaca pueyari jiyanojua shiriiquitiuniutianiya nojori jaara cuno puereeta niquishano Casaa niquiri tacatehuano, teyanote tariucuacaanu quijia quiquiaaricujani, quiarjia saniniuujia majaari na quiniu. Jiya shipiniyaquishacarjia, cuno pueya sesacacujaaari Pueyaso saquiriojosano pueya sesaca naajiotasaqui naajiotasoo quiquiaari.

⁹ ‘Cante niishijiani, nojuaja cuara niishiiria cua pohuatasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhuananuhua, teyanocua cuno Paanatu cajiyacuajani.¹⁰ Cuno siete jiyaniijianucujinijinioni, cinco nojorijinijiniori tari shaajasaquaaari. Cuno caapiqui cureenoinijini, niquiriyatuuri jiyaniijia quiya quiarjia. Tamonuuri supueyojua. Nojuaja jaara supuere, saaja ru-

paquijia rishiniutianiyari jiyaniijia na quishacari. ¹¹ Cuno puereeta niquishano Casaa, teyanote tariucuacaanu quijia quiquiaaricuajani, nojuajaari cuno cinco shaajasano jiyaniijianucua jinijinio quiquiaaricuaja. Majaari quiarijia na quiniu. Na nuhuaji supuenutaniu huari octavo jiyaniijia na quiniuria rupaquijia. Na nuhuaji shaajasaanutaniya cutaraari.

¹² 'Cuno diez nacajaa quia niquishano janiuhuaj, cunoori diez jiyaniijianucuaranocuaja. Nojoriiri cumaaca niquitiosaanutaniya saaja niquiriyatu hora jiyaniijianucua nojori quiniuria cuno puereeta niquishano Casaata. ¹³ Cuno diez jiyaniijianucuaari mariyata niishiriojonutaniya nojori cumaquiniuria cuno puereeta niquishano Casaa puetunu nojori cumaacatajanaa, jiyaniijijajanaa cuno puereeta niquishano Casaa quiniuria. ¹⁴ Nojoriiri Borrego Niquiojuata miaquetoojonutaniya. Borrego Niquiojuuari nojori shocotanutaniya saaja, seetanujuanaa Jiyaniijijajanaa na quiniuucua. ¡Nojuajaari puetunu jiyaniijianucua janaa Jiyaniijia! Nata quiniaa pueyari Pueyaso saquirojosano pueya, Neyanu tojitiajacatuhuj.

¹⁵ Pueyaso seruuri socua cua sequeree:

—Quiaacuajaari cuno Paanatu niquirii puetunu mohuacaacuajanaa cajiyo. Cuno mohuacaacuajaari queraatia tiaca, tamaatiuucua pueyapue, tamaatia rupaaca pocuajacajuhuj, tamaatia jiyacajinia quijiaca pueyano. ¹⁶ Cuno puereeta niquishano Casaa quia niquishanoni, na diez nacajaanio, nojoriiri cuno Paanatu niquiniu paniyaquiniutianiya tojetaarucuajanaa. Na cartetunutaniyari. Tojetaarucuajanaa juhuasu na tiujiatunutaniyari. Nojoriiri cuno Paanatu miaquenutaniya. Na nuhuaji, na nucuhua catijiatunutaniyari. ¹⁷ Pueyasojuanaacuajaari cuno Paanatu paraa niishitiniutianiya naa nojori miiniuria cuno Paanatutej, taa Pueyaso paniya na

miishaanuracuajani. Naajuhuj, Pueyasoori cuno diez jiyaniijianucua niishiriojotenutaniya jatiqii. Naacuajitij, cuno jiyaniijianucuaari roojotoonutaniya nojori cuara cumaquiiria cuno puereeta niquishano Casaa puetunu nojori cumacatajanaa. Naacuajitij, Pueyaso panishanoori tohuateesaanutaniya taa na sequequiaaricuajani. ¹⁸ Naajuhuj, cuno Paanatu quia niquishanoni, nojuajaari cuno puereetuca Roma tiacacuja, miriqui sequeshiya Babiloniatani. Nojuajaari puetunu mijiria jiyaniijianucujanaa tojitiquiaa nojuaja.

18

Babilonia tiaca catetanujiniji pahuatasano

¹ Naa Pueyaso seru niquitiniu nuhuaaji janiyatej, janiyari socua tamonu Pueyaso seru niquirii jiyocuacaanuji roseyanoni. Jiyanoehua cumaacaracaari quiriquiaa. Na shacantuuca cumaacaari jiya cuhuatariquiaa. ² Jiyocuacaanuji na rupaa paaretaree jiyanohuari. Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyarequetasaareeri cuno puereetuca tiaca! Samaruhua quiquiora jatanishaaree quiarjia saniniuurijia. Naaquiya quiquiora quiniutianiyajaariuhuj, puetunu pueya soosano pueresano jaacuatujuaca casaajanaa quiquioranio. ³ Puetunu jiyacajinijiniojuanaa pueyari sapojonuusaaquiaari Babilonia tiacajinijinio niishitiojosanota, juhuajaniya sacuaraatia miijica nojori quiniuriajuhuaj, juhua mashaaseca. Naajuhuj, jiyaca jiyaniijianucuaari Babilonia tiacajinia sacuaraatia miijosano miijioquiaajuhuj, cuno paanatu shiniujiuniuucua nojori. Babilonia tiacajinia quiniaa pueyari puetunu na panishano casamijianaa

masejoquiaa puetunu jiyacajinijijianaa, saaja tama nojori cuaqueyajaaja nojori shuquiritiniuria. Naacujatij, cumaneecara na casami niqutiojonuujuaca pueyari jiyanhua cumaneecaraca pueya.

⁴ Na nuhuaji, janiyari tamonu rupaa tojirii jiyocua-caanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiniji nia quiojore, niaa mariqui sesa miijacara quiriohuari, cuno sesa miijaca nia cojiniuucua! Nojorijiniji nia carajere, niaa mariqui puetunu nojoritijanaa cojiritiasaare naquiya miiniu-
uri. Nojoricuajaari quera saniitioshiya. ⁵ Cuno tiacajinia sacuaraatia miishanoori puera jiyanhua caneyaree. Juhua tuhuananuuri maashiyaree jiyocuaaanura. Pueyasocujaari sacuaraatia nojori miijosano niishiya. Majaari socua tari na naata rejeretanu. ⁶ Babilonia cuaara namishaaria taa naquiya na miijioquiaa tamasacuaani. ¡Nojuaja cuaara saniitionu caminiujiushaaria saniniuujia, sesa na miiniuucua tamasaca! Babiloniaari juhua pueya raatejoquiaari sacuaraatia na niishishano, sesa miijaca nojori quiniuria juhua nojuajuhuj. Cunora, nojuaja cuaara puetunu Pueyaso juaaquiacajanaa raatesaaria, tama na suhuocojiniaaja mishinishanoni. ⁷ Naatej, taa tama na cuaqueyajaaja na shuquiritiquiaa sacuaraatia na miishacaricuaani, saniniuujia cuaara naa jiyanhua miitiasaariajuhuaj. ¡Jiyanhua tama na cuaqueyajaaja timiti-
aja na quiniuucujuhuj, cuaara saniitiosaaria! Nojuajaari tama sequequiaajaacujua: “Janiyari niya cajiya shuquiritiani, cumaacaraca maaji, pueya tojishano jiyaniijia. Janiyari maja mashiquioni. Majaari quenaaja cua taraajenu quiniutianiya”. ⁸ Cunora, niquiriyatu juucajiniaja, cuno Paanatuuri jiyanhua taraatia miitiasaanutaniya. Jiyacaritij, cusonuunuuri quiniutianiya, naquiya miiniu, miaajenujuhuaj. Jiyacari catijiatasaanutaniyajaariuhuj.

Jiyanhua cumaacaraca Jiyaniija Pueyaso quiniuucua, nojuajaari naa saniitionutaniya cuno Paanatu.

⁹ Mijiria jiyaniijanucuaari sacuaraatia miiniuria cojiquiaa cuno Paanatucujaja, tama nojori cuaqueyajaaja nojori shuquiritiniuria. Cunora, nojoriiri jiyanhua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya.

¹⁰ Nojoriiri na puerenuta na shootianutaniya tucuaaanuji, nojori mariqui saniitiosaarejaariuhuj. Nojoriiri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniuniaal!
¡Quiaari jiyanhua cumaacaraca quijia juucua Babilonia!
¡Quiaari canashiyaquiji saniitiosaaree!

¹¹ Puetunu jiyacajiniajanaa, cumaneecara na casami niquitiojonaa pueyari Babilonia tiacaacua nujuquetunutaniya. Nojoriiri jiyanhua taraatia quiniutaniya nojori niishishacari, nojoritiucua tee na casami niquitiojore na cumaneecarani.

¹² Tucuaaanuji Babilonia tiacajiniara nojori nitiasano casami quijiaari nio: oro, plata, jiyanhua panishano sajiuhuj, noturu shipinijosano sainio. Nitiasaaquiaajaariuhua maniniuqui toqueya linojiniji, sedajiniji toqueya, shaaruque toqueyajuhuj, juhua jiyaniija cushishano, naatuque toqueyano. Nitiasaaquiaajaariuhua puetunu tamaatia shanhua jaanujua juhuana raquiquia, elefante quiaajiniji shipinijosano casamijuhuj, shanhua naanajiniji shipinijosano casaminio. Nitiasaaquiaajaariuhua broncejiniji shipinijosano casami, cumueeca casaajiniji shipinijosano casamijuhuj, shanhua mármol saajajiniji shipinijosano casaminio. ¹³ Naajuhuj, nio shanhua jaanujua casami: canela, miesu nunacuhua, catijasocoriquiano shanhua jaanujua

casaa, mirrajuhuaj, cuaqueyacua shuquiujutiasano shanohua jaanutajanio. Nitiasaaquiaajaariuhua jereeca uva caaca, shiyocua, maninia cashojuajuhuj, trigo jajaunio. Nitiasaaquiaajaariuhua casami niyotesano seya, borregohua, caballohua, caballohua jayotasocoriquiano shipinijosano casaanio, cumaneecara niquitijosocoriquiano pueyajuhuj seya nojori quiniuria. ¹⁴ Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanhua quia maniniucuasano naana jajau, jiyanhua quioojia jiaatiasano nocuani! ¡Puetunu quia timitiasano casaajanaari maja tari na quiniu quiniutianiya quiara, shanohua niquishano casami, jiyanhua cumaneecata quia masesano casaminio!

¹⁵ Puetunu cuno casami niquitiojonaa pueyajanaari jiyanhua casamiriaca quiya Babilonia tiacajinia quiniaa masejonuucua nojori casami. Maja nojori saniitiosaanurajuhuj, cuno pojoriiri tucuacaanuji na puerenuta nocua nujuquetanutaniya. Nojoriiri na sapuenuta naa na sohuarejotanutaniya:

¹⁶ —¡Juhuej! ¡Babiloniaari tiaca maniniu quijia juucua! Jiyanhua shanohua niquishano quijiaari, taa casamiriaca maajicuaani, na cushishacari na maniniushitiaja casaa. Naa shanohua niquishiyari juhua maaji linojiniji cohuaaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijuhuaj, noturu shipinijosano saitiajuhuaj, shanohua niquishano saitiano. ¹⁷ ¡Jiyanhua queraatia puetunu na jiiatiasano casamijianaari canashiyaquiji catijiasaaree juhua sohuanatu!

Puetunu pueyajanaa, canapuate shoniniacu caminiajinia poonijionaa na cumaneecaracuajani,

nojoriiri tucuaaanuji shootiariquiaa Babilonia tiaca catetasacari. Naa shootiatuquiciaaariuhua casami jaquerojuaca tamaquicua tiaca tacatajajiniaqueya, ruconaa pueya, buquejina poonijionaa pueyajuhuaaj, nojori camarucuanio. Puetunu cuno pojorijianaari tucuaaanuji shootiariquiaa Babilonia tiaca catetasacari.
¹⁸ Nojori niquishacari najaca nujuaano jiya cajiniocuara, nojoriiri naa sariyocuaturee:

—¿Socua tamonu tiacateeri quiya juhua cuno Babilonia tiacajuhuaaj? ¡Shaaqui!

¹⁹ Jiyanhua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri naa sariyocuaturee:

—¡Juhuej! ¡Babiloniaari tiaca maniniu quijia juucua! ¡Puetunu shoniacu caminiajina buque jitianajanaari jiyanhua casamiriaca quiya, jiyanhua casamiriaca Babilonia quiniucua! ¡Quiarjia saniniuujia, canashiyaquiji puetunujuanaari shaajasaaree!

²⁰ Jiyacaritij, Pueyaso seruuri naa nacaree:

—¡Nia shuquiriri, jiyocuacaanu quijiacanaa! ¡Babilonia saniitiosaanuucua nia timiquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhuaaj, Pueyaso sequesano caminiujiuniaanio! ¡Pueyasocuaaari niaacua namirii Babilonia!

²¹ Jiyacaritij, cumueeca Pueyaso seruuri jiyanhua puereetuca saajia paree, juhua trigo jajau jcanojotaja saajia. Shoniacu caminiajina na jatasacari, naa sequereeri:

—¡Taa cua jatasano saajia shaajemaa shoniacu caminia queronijiniacuaani, quiaari naa shaajasaanutaniya canashiyaquijijuhuaaj, Babilonia tiacanaa! ¡Majaari socua quia niquishaanu quiniutianiya!
²² ¡Quia nuucuaari tojetaarucujanaa sanaaca quiniutianiya! ¡Majaari arpa taquiniojonu tojishaanu

quiniutianiya socua, turequenaco jonenenuunujuhuj,
 trompeta jonenenuununio! ¡Puetunu tamaatia
 poonijosano niishijiaca juaashiquiaraca pueyajanaari
 shaajasaanutaniyajuhuj! ¡Majaari quenaaja
 niquiriyatu cureenu quiniutianiya quia quishaquil!
 ¡Naajuhuj, majaari socua riiquiniuniu tojishaanu
 quiniutianiya! ²³ ¡Majaari quenaaja niquiriyatu
 samaritiu niquishaanu quiniutianiya noshiyano
 quia quishaquil! ¡Naajuhuj, majaari camishacari
 queranacunuunu cojuatunenu tojishaanu quiniutianiya
 socua! ¡Quiaari naa saniitiosaareequij, jiyanohua
 cumaacaraca quia casami niquitiojonaa pueya
 quiniuucua puetunu jiyacajiniajanaa! ¡Naajuhuj, quiaari
 puetunu jiyacajinia quijiaca pueyajanaa shimiojona,
 sapojosano nojori quiniuria puetunu sacuaraatia
 casaa quia miijosanotajanaa! ²⁴ ¡Quiarjia saniniuujia,
 quiocua tiutiashiyari pueyara Pueyaso sequesano
 caminiuujunaa puecoosaanu, Pueyaso saquiriojosano
 pueya puecoosaanujuhuj, puetunu jiyacajiniajanaa
 pueya puecoosaanunio!

19

¹ Naa cua tojiniu nuhuajitij, janiyari jiyocuacaanu tojirii
 queraatia rupaacani. Naa sequeturiquiaa jiyanohuari:

—¡Jiyanohua maninia pa Pueyaso! ¡Nojuaja
 pa shuquiritiare! ¡Nojuacuajaari pa
 Jiyanoojia! ¡Nojuajaari jiyanohua shacantuuca,
 tojetaarucuajanaa maninia miijia na quiniuucual!
 ¡Puetunu cumaacaracajaariuhuj! ² ¡Maninia
 na niishiniuucua puetunu cuno Paanatu
 miishano sacuaraatiajanaa, nojuajaari maninia
 na saniitioree! ¡Cuno Paanatuuri jiyacua
 quijiaca pueya sesoquiaari tojetaarucuajanaa,

sacuaraatia na miiijosano na niishitiojosanota!
 ¡Pueyasoori cunora na saniitioree! ¡Naajuhuj,
 Babilonia puecoonuucua Pueyaso tojitiajaca
 pueya, Pueyasoori na namiriijuhuaj!

³ Jiyocuacaanuji rupaaca cua tojishanoni, nojoriiri naa sequerohuacuhuj:

—¡Jiyanohua maninia pa Pueyaso! ¡Nojuaja pa timi-
 tiariquia pueyaracaanu! ¡Pueyaracaanu cuno
 Paanatu saniitiosacari, majaari na najaca turetano
 quiniutianiya quenaaja!

⁴ Cuno veinticuatro niishijiaca jiyaniijianucua, cuno
 cuatro saminio casaajuhuj, nojoriiri jiyacari jiyocuara
 jacamaturee Pueyasooacara. Nojoriiri naa timitia-
 ree Pueyaso, cante na shacantuuca cumaacajinia ca-
 jiriquiaacuajani. Nojoriiri naa na sequeturiquiaa:

—¡Cuaara naa quiiriatej! ¡Pa Jiyaniijia cuaara timitiasaaria
 pueyaracaanu!

⁵ Jiyacaritij, tamonu rupaari tojishaaree Pueyaso ca-
 jishaquijijianaa. Naa sequeriquiaari:

—¡Pa Pueyaso nia timitiariquia, puetunu na tojitiajaca
 pueyanaa! ¡Nojuaja nia shuquiritiare, tojishano
 pueyanaa, nijaniyajuhuj, tojishoo pueyanaa!

*Borrego Niquiojua camishocoriquiano maaji
 maniniushishacari*

⁶ Jiyacaritij, janiyari queraatia pueya tojirii jiyanohua
 nacaanoni, juhua puereetuuca sararojua, juhua mia-
 cana majacunujuhuaj. Puetunu nojorijianaari naa se-
 queriquiaa:

—¡Jiyanohua maninia pa Jiyaniijia Pueyaso!
 ¡Nojuaja pa timitiariquia pueyaracaanu!
 ¡Nojuacuajaari Jiyaniijajanaa! ¡Puetunu
 cumaacaracajanaajuhuj! ⁷ ¡Pa shuquiriri! ¡Pa
 timiri! ¡Quiarijiacuajaari Borrego Niquiojua

caminiu juuca, pueyaracaanu na saquiriojosano pueya rupuenura nojuaja! ¡Cunora, nojuaja pa timitiare jiyanohua! Necoranoori tari maniniushirii na caminiuria. ⁸ Maniniuqui lino toque cushitishaareeri, cohuajaque shacantuque. Necoranoni, nojoricuajaari puetunu nocua tiuujiaa pueyajanaa. Naajuhuj, cuno cohuajaque na toqueni, cunocujaari puetunu maninia nojori miiijosanojuanaa.

⁹ Pueyaso seruuri jiyacari cua sequeree:

—Quia naajiotare nio: “Shuquiriaatia quijiaca cutaraari noo pojori, canapuate Borrego Niquiojua camishacari queranacujuajiniara masuusanoni”.

Naa cua sequeree socuaari:

—Cua sequesaroni, cunoori seetanu Pueyaso rupaa-janaa.

¹⁰ Jiyacaritij, janiyari Pueyaso seruucuaa mojuquetareeni, juhua Pueyasoocuaa, nojuaja cua timitianura juuca. Cua sequequee saajaari:

—¡Maja pueyanonaa! ¡Maja naa quia miiniu! Janiyari nareja Pueyaso seruni taa quiajaniyacuaani, juhua quia tapueyocujuhuj, noo pojori canapuate pa Jiyani-ijia Jesujiniji pohuatanu tarinitiaashijiacani. ¡Pueyasoocuaa quia mojuquetare cutara, quia timitianura nojuaja! Puetunu Jesujiniji pohuatasanojuanaani, cunoori Pueyaso Sohuanu niishitishano na pohuataanaa, janiya, niajaniyajuhuj.

Cohujohuana caballo nijinia cajiniajiniji pohuatasano

¹¹ Na nuhuaji, janiyari jiyocuacaanu Pueyaso quiquio niquirii tariucua riatasanoni. Janiyari tii niquirii cohuajohuana caballoni. Na nijinia cajiniaari caapiqui sesacaraca quiriqiaa. Nioori na sesaca: “Na sequesano miiija”,

“Seetanu sequejajanaa”. Naari na sesaca. Tojetaarucujajanaa maninia miijia na quiniuucua, puetunu niishijajanaajuhuj, nojuajaari seetanujanaa maninia sanitionjua sesa miijia. Naajuhuj, majaari najuhua na miaquetojonu na paraata. ¹²Puetunu casaajanaa niqijia na quiniuucua, na namijaari juhua mani rimianacuyano niqishaariquiaa. Jiyaniijianucuarano shipinijosano nacaqueya pasacoriquiaa na nacaacuaari. Cunoori seetanujanaa Jiyaniijajanaa na quiniuucua. Tamonu na sesaari naajiotasano quiriqiaajuhuj. Cuno sesaari tama na niishishanojuaaja cutara. ¹³Na toqueeri nanacatuque quiriqiaa. Nojuajaari tariucuaaanu nio sesaraca quijiacuja, “Pueyaso Rupaa”. ¹⁴Jiyocuacaanu nata quiniaa na soldadohuari na nuhuaji sacuariquiaa. Puetunu nojorijianaari cohuajohuanaca caballohua nijinia cajitiuriquiaa. Naajuhuj, nojoriiri linojiniji cohuajaquijasano toqueyaraca quiriqiaa, jyanohua cohuajaqueya tojetaarucujanaa. ¹⁵Nojori Jiyaniijajanaa rupaamaji, nijinaquetucuja mueruuri puereeta mueranacuriquiaa. Cunoori puetunu mijiria jiyacajiniajanaa na tojitiaashijia na puetujutajara. Nojuajaari jiyacari nojori Jiyaniijajanaa quiniutianiya, nojori na jiitianura jyanohua na cumacata. Puetunu cumaacaracajanaa Pueyaso juaaquiata nojori saniitionutaniyari, naatej, taa uva rapijioshiya na caaca shoonuracuaani. ¹⁶Na tucuaque toqueecua, na ruhuajacuucujuhuj, naa naajiotasanoori quiriqiaa: “Jiyaniijianucua Jiyaniijajanaa”, “Camarucua Camarnujanaa”.

¹⁷ Na nuhuaji, janiyari tamonu Pueyaso seru niquirii pananuucua nujuaanoni. Nojuajaari puetunu jiya cajiniocua jaacuatujua casaajanaa jiiquioonuuriquiaa jyanohua, teyano jaacuatujuaate shu miojonuujuaacujani. Naa cuno jaacuatujua casa sequeriquiaari:

—¡Miji, niya nia rerejosee! ¡Pueyasoori nia quer-anacutenutaniya! ¹⁸ ¡Nojuajaari queraatia shu nia mi-anuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyanohua cumueeca puereyaquijiaca shu, caballohua shu, na nijinia cajitiuniaa pueya shujiuhuj! ¡Camarucuaaju pueya shuuri quiniutianiyajuhuj, poonijotesano pueya shu, tojishoo pueya shujiuhuj, tojishano pueya shunio!

¹⁹ Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriquiaa na miaquetojonura cohujhuana caballo nijinia cajianota, nata quiniaa na soldadohuatano. ²⁰ Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaca pueya na sapojonura na cumaacata na miishanota, nojori na tiutiniuria na naca pishano cushiriinohua Casaacua. Naa na sapojonuucua mijiria quijiaca pueyatej, nojoriiri nojori cuaqueya tarinitiaquiari na naca pishano cushiriinohua Casaa sesa naajiotasaanura nojoriicua. Naajuhuj, nojoriiri juhua cuno puereeta niquishano shipinishano Casaacuara mojuquetacojua quiquiaari juhua Pueyasooacara. Jiyacaritij, cuno caapiqui puereeta niquishano Casaari azufreta noshiyano mani quiquojinia quejoosaaree saminiucujaja. Nojoriiri tii pueyaracaanu naquiya miishaanutaniya. ²¹ Puetunu nojoritia quiniaajanaari saniniuujia puecoosaaree nijiniaquetucujaja mueruuta, teyanote cohujhuana caballo nijinia cajiyano rupaamaji mueranacuriquiaacujani. Puetunu jiya cajiniocua jaacuatujuaca casaajanaari nojori shu tooquioree jiyanohua.

20

Mil marijiara Satanás morosaanujiniji pohuatasano

¹ Na nuhuaji, janiyari tamonu Pueyaso seru niquirii jiyocuacaanuji roseyanoni. Puequeetuuju raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. ² Pueyaso seruuri cuno naatuhuana Naaqueru juhua cohuaniquia niquishano quiasee. Na morojoreeri mil marijiara. Nojuacuajaari cuno tariucuacaanu Soconu, samaruhua jiyaniijajanaatuhuj. Na sesaari “Satanás”. ³ Maninia na morojonu nuhuaji, Pueyaso seruuri puequeetuuju raama na jartaree. Raa tiotiu mishiquiorohuari. Tiootiu rupanacureeri, maja na riatasaanura. Sesaacaari naa mishiquiosaareequij mijiria quijiaca pueya na sapo-jiyaquiniuucujaji cuaara na shocojorejaatijia mil marijia. Cuno mil marijia jaara na shocojore, rupaquijjara cartesaanutaniuhuari na saniitiosaanuhuarajanaa cutara.

⁴ Janiyari jiyacari queraatia pueya niquirii jiyaniijia cajitiucuajinia cajitiuyanoni. Nojoriiri nequesoreenaara Pueyaso jiyatesano pueya quiriquiaa, mijiria quijiaca nojori jiitianura. Janiyari noo pojori sohuanuhua niquiriijiaaniuhuj, canapuate nacareesaaquiaaricujani nojori poojotanuucua pa Jiyaniijia Jesujiniji, Pueyaso rupaa tojitiajaca nojori quiniuucujuhuj. Nojori cutaraari cuno na naca pishano cushiriiniohua Casaacuara jacamatiuyaquiquiaari tojetaarucujanaa, juhua nojuaja niquishano shipinishano Casaacuarajuhuj. Naajuhuj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niqiara samiitiacoquee, jiyaniijianucua nojori jiyatesaanural! Mil marijiaari nojori shocojoree, jiyaniijianucua nojori quishacari pa Jiyaniijia. ⁵ Saniniuujia, narta macunucuaari maja na samiitianijiosaanu quiriquiaa

cuno mil marijia cuaara shocojorejaatijia. Nio macunucua samiitianijosacari cua niquishanoni, cunoori coteenujuanaa Pueyaso samiitianijosacari pueya. ⁶ Shuquiriaatia quijiaca cutaraari noo pojori, canapue Pueyaso samiitianijionutaniya coteenujuanaacuajani. Nojoriiri jiyacari tojetaarucuajanaa maninia quijiacara jatanishaanutaniya pueyaracaanu rishijiaca nojori quiniuria. Naacuajitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuujia, nojoriiri pueyaracaanu shamaatia timitianutaniya Pueyaso, Cristonio. Naajuhuj, nojoriiri jiyaniijianucua quiniutianiya Cristota, mijiria quijiaca nojori jiitiasacari cuno mil marijia.

Sesaaca saniitiosacarijianaa cutara

⁷ Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸ Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyano. Nojori na sapojonuta, nojuajaari puetunu jiyaca jiyaniijianucujanaa rerejotenutaniya, puetunu nojori soldadohuatajanaa, nojori miaquetoojonura pa Jiyaniijiaata, puetunu na pueyatajanaanio. Nojori soldadohuari jiyanohua queraatia pueya quiniutianiya, juhua shoniniacu caminia shuriuquioco paajia jaaquia. Majaari na naata serojosanu.

⁹ Cua niquishacari, tojetaarucuajanaa jiyanohua queraatia pueyari nijioriquiaa. Jiya pueturiquiaa puetunujua-naari, juhua tereya nojori quiniucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso pueyano. Jiyacaritij, maniiri jiyocuacaanuji tinishaare nojoriicua. Puetunu cuno pueyajanaari catijiasaaree tojetaarucuajanaa. ¹⁰ Satanás, cante puetunu

cuno pueyajanaa sapojoreecuajani, nojuajaari caminia-jinia jatasaaree tee cuniqui mani noshiya azufretacuajani. Tariucuacaanu tii jaqueroosaaquiaaricuajaari na naca pishano cushiriiniohua Casaa, narta puereeta niquishano Casaanio. Cunocuajaari mijiria quijiaca pueya sapojo-quaaricuaja, na naca cushiriiniohua Casaacuara jacamatujuaca nojori quiniuria. Nojoriiri tii miitiasaanu-taniya tojetaarucuajanaa pueyaracaanura, juuca, niucuanio.

Macunucua nequesoreesacari cohuaja cajitiu tacoji

¹¹ Na nuhuaji, janiyari Jiyaniijajanaa cohuaja puereetuuca cajitiu niquiriini, tii cajinianio. Na niquiara, jiyari puetunu shaajequeejanaa, jiya cajiniocuanio. Ma-jaari socua na niquishaanu quiriohua. ¹² Jiyacaritij, janiyari puetunu macunucuajanaa niquirii nujuatiuyano cuno cohuaja cajitiu tacojini; jiyaniijianucua, tojishoo quijiaca pueyano. Jiyacaritij, na cohuaja cajitijinia cajiniaari na nequesoreetuneeca riataqueree, socua tamonu nequesoreetuneenio. Cuno nequesoreetuneejinia naajiotasano quiyacuajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuacaanu macunucuajanaari nequesoreesaaree puetunu nojori miishanojinijijianaa, taa cuno nequesoreetuneecajinia na naajiotasaaquiaaricuajani. ¹³ Cua niquiara, macunucua quiquiojinia racatasano puetunu cusunuuno sohuanuhujanaari na cuaqueya rupuetesaarohua, shoniniacu caminiajinia moquecono, jiyacua moquecononio. Puetunu nojorijianaari nequesoreesaaree taa miijiaca nojori quiquiaaricuajani. ¹⁴ Na nuhuaji, Cusojuana, macunucua Quiquiojuhuaj, nojoriiri mani noshiyano caminiajinia jaqueroosaaree. Canapuete cuno mani noshiyano caminiajinia quejoosocoriquiano pueyacuajani, nojoriiri cusununu pacu-teriquianocujaja. ¹⁵ Naacuajitij, canapuete Pueyaso samitianijiosocoriquianohua nequesoreetuneejinia naajiota-

soo quiriquiaani, nojoriiri mani noshiyano caminiajinia quejoosaaree pueyaracaanura.

21

Quiarinio jiya cajiniocujiniji pohuatasano, quiarinio jiya-jinijinio

¹ Na nuhuaji, janiyari quiarinio jiya cajiniocua niquiriini, quiarinio jiyanio. Coteenujanaa jiya cajiniocuaari tari shaajasano quiriquiaa, jiyanio. Naajuhuj, majaari shoniniacu caminia quiniu quiriquiaa tari. ² Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucujanaa shanohua maniniushitishano quiriquiaari, juhua neyacarano camishocoriquiano niyaco. ³ Naajuhuj, janiyari Jiyaniijajanaa cajitijuniji tojirii jiyanhua nacanuni. Naa sequeriquiaari:

—¡Pueyaso Quiquoori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhuj! ¡Nojuajaari nojori cojiniutianiya, nojori Jiyaniijajanaa na quiniuria, maninia na jiitianura nojori! ⁴ ¡Nojuajaari puetunu nojori namijiaacajanaa tuujunutaniya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucujaari tari shaajasano quiriquiaa!

⁵ Na nuhuaji, Jiyaniijajanaa cajitijunia cajiniaari naa sequeree:

—¡Cua tojiri! ¡Janiyari quiariniora miijia puetunu casaajanaani!

Cua sequereejaariuhuj:

—Cua sequesano quia naajiotare. Seetanujanaari cua sequesano. Janiyacuajaari cua sequesano tohuateequiaa pueyaracaanuni.

⁶ Cua sequerohuariuhuaj:

—Cua sequesano cua miishocoriquianoni, janiyari tari na tucuatatee miiniuni. Janiyari quijiajuhuanani. Janiyari pueyaracaanu quiriquianojuhuaj. Janiyari puetunu casaajanaa coretanijiani, na shaajajajuhuj. Cante jiya-mueyani, janiyari pueyaracaanu pacartaja samo naca-jiniji na raatenutaniyani, na naatanuhua. Cuno samitianiija mohuacani, cunoori cua Sohuanucujaja. Janiyari nareja na niqutioquiaani. Majaari na sami cua masenu quiquiaa na ratuna. ⁷ Cante puetunu casaajanaa rejeretaja quijiani, cua tojijia na quiniuucua, nojuajaari puetunu cua jiitiasanojuanaa jiitiana quiniutianiya. Nera, janiyari na Pueyaso quiniutianiyani. Nojuajaari quiyantu quiniutianiyacujua. ⁸ Sesa pueya saniniuujia, nojori-iri puetunu quejoosaariquianojuanaa azufreta noshiyano mani caminiajinia. Naa quejoosaanutaniyari nio pojori: Pueyaso tojitiaashijiaca pueya, puerejaca nojori quiniuucua, Pueyaso Rupaacua tiuyashijiaca, soosano pueya tama sesa nojori miiniuucujaja seseno, pueya moojuaca, na camishoo maajipohua numuetucunuujua, shimiacuri, shipinijosano casaacua jacamatujuaca juhua Pueyasoocua, puetunu cuaracashijionuujuaca pueyajanaano. Puetunu cuno pojorijianaa jaara nequesoreesaare, nojoriiri puetunu taanuusaanutaniyajanaa Pueyaso shuricuaji. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cunocujajaari sequeshiya, “pueya pacutesacariuhua cusonu”.

Quiarinio Jerusalén tiacajiniji pahuatasano

⁹ Janiyacuajaari tari nia pahuataree cuno siete Pueyaso seyajinijini, canapuate siete miacojua patootanaa quiquiaaricujani, mishaja Pueyaso saniitiotajata. Niquiriyatu nojorijinijinioori cucua nimiaa. Nojuajaari cua sequesee:

—Miji. Quia niquitiriiria Borrego Niquiojua niquiorano. Nojuacuajaari pa Jiyaniijia pueya, na quiquiojaariuhuj.

¹⁰ Jiyacaritij, nojuajaari cua sohuanu jiyataaree jiyanoehua puereetuuca jiyaconaja tuhuananuucua. Tiji cua niquitirii cuno puereetuuca quiarinio Jerusalén tiacaari, Pueyaso shuriucuaji roseyano. Tojetaarucuajanaa shanohua maniniushitishano quiriquiaari. ¹¹ Nenecuariquiaari Pueyaso shacantuuca cumaacata. Na nenecuanuuri juhua jiyanoehua panishano saajia nenecuanu quiriquiaa, juhua jaspe saajia. Maatia niquishiyari na tamajiria, juhua cohuaja motiiquio. ¹² Cuno tiaca shocua matacaari jiyanoehua puereetuuca quiriquiaa, jiyaconajajuhuj. Tiaca shocua matacaari doce tiotihuvaraca quiriquiaa. Niquiriyatu Pueyaso seruuri puetunu cuno tiotiujiinjijianaa nujuaturiquiaa. Naajuhuj, supuetana Israel doce niquiohuacuajinio supueno doce pueyapue sesacaari puetunu cuno tiotihuacuajanaa naajiotasano quiriquiaa. ¹³ Jiuujianaraca tiotihuuari pananu muetasamajiria quiriquiaa, cuno tiaca matacaacua. Socua jiuujianaraca tiotihuuari quiriquiaa pananu muetasamaji miaquetajara. Naajuhuj, socua jiuujianaraca tiotihuuari pananu muetasamaji muenecara quiriquiaa. Socua jiuujianaraca tiotihuuari quiriquiaa pananu tiuquishocora. ¹⁴ Cuno tiaca matacaari doce puereetujuaaca saicua nujuatariquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

¹⁵ Cuno Pueyaso seru cuata pocoojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotihua, tiaca shocua matacanio. ¹⁶ Cuno tiacaari jiyanoehua tucuhuaana quiriquiaa. Na

cajiniocuaari mariyata juhua na tucuhuana quiriquiaa-juhuaj. Maninia tiasano quiriquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriquiaari na tucuhuana, na jiyaconaja, na cajiniocuanio. ¹⁷ Na nuhuaji, tiaca mataca shanacujureejaariuhuj. Setenta y cinco metro jiitariquiaari. Pueyaso seru shanacujutaja tucaneeri mariyata juhua mijiria pueyano shanacujutaja quiriquiaa. ¹⁸ Cuno tiaca matacaari puetunu jaspe saijinijijianaa shipinishano quiriquiaa. Tiacaari sanini-uujia saaja orojiniji shipinishano quiriquiaa, maja que-naaja tamonu casaata cojitishano. Naacuajitij, cuno oroori juhua cohuaja motiiquio quiriquiaa. Maatia niquishiyari na tamajiria. ¹⁹ Cuno mataca nujuataja doce sairi queraatia tamaatiujiaaca shanohua niquishano saitia maniniushitishano quiriquiaa. Cuno mataca nujuataja doce sajinijinioni, coteenu saajiaari jaspe saitia maniniushitishano quiriquiaa. Jaspe sairi neeruuca cojitishano pocojuanaqueta. Segundo saajiaari zafiro saitia maniniushitishano quiriquiaa. Zafiro sairi nentujuaaca naata. Tercero saajiaari ágata saitia maniniushitishano quiriquiaa. Ágata sairi tejatujuaaca neeruuca. Cuarto saajiaari neeruuca esmeralda saitia maniniushitishano quiriquiaa. ²⁰ Quinto saajiaari ónice saitia maniniushitishano quiriquiaa. Ónice sairi pocojuanaque naatuuca cojitishano. Sexto saajiaari naatuuca cornalina saitia maniniushitishano quiriquiaa. Séptimo saajiaari crisólito saitia maniniushitishano quiriquiaa. Crisólito sairi tijiaaca. Octavo saajiaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajiaari topacio saitia maniniushitishano quiriquiaa. Topacio sairi jiyanohua pocojuanaque. Décimo saajiaari crisoprasa saitia maniniushitishano quiriquiaa. Criso-

prasa sairi jiyanoehua neerujuaaca. Undécimo saajiaari jacinto saitia maniniushitishano quiriquiaa. Jacinto sairi jariya naata naatuuca. Duodécimo saajiaari jiyanoehua nentuuca amatista saitia maniniushitishano quiriquiaa. Puetunu cuno saijianaari jiyanoehua shanoehua sai, shacantujuaaca. ²¹ Tiaca shocua mataca doce tiotiuhuari noturu shipinijosano saijiniji shipinijosano quiriquiaa. Niquiriyatu tiotiuuri niquiriyatu noturu saajiajiniji shipinishano quiriquiaa. Naa shipinijosano quiriquiaari puetunu cuno doce tiotiuhuajanaa. Tiaca nuucuaaari tojetaarucujanaa orojiniji shipinishano quiriquiaa. Jiyanoehua maninia cuno oro quiniuucua, Pueyaso shacantuucaari na tohuariquiriquiaa, juhua motiiquio cohujaco na quiniuucua.

²² Cuno tiacajinia, majaari cua niquniu quirii Pueyaso Quishaqui, tii pa rupenura nojuaja. Cuniqi, majaari socua Pueyaso Secojua tia panishaanu. Puetunu cumaacaracajanaa Pueyasojuanaari tii quiyacuaja, Borrego Niquiojuajuhuj. Puetunu cuno tiacajanaari nojori quishaquicuaja, pueyaracaanu nojori rupesano pa quiniuria. ²³ Cuno tiacaari maja na paniniu pananu na cuhuatariquiano, racajuhuj. Pueyaso shacantuuca cumaacacuajaari na cuhuataa. Borrego Niquiojuacuajaari na cuhuatana. ²⁴ Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujanaari socua nojori panishano casami patootanutianiya nojori cuhuatana tiacajiniara, Jiyaniijajanaa nojori niquitiosocoriquiano. ²⁵ Cuno tiaca tiotiuhuari pueyaracaanu riataquesano quiniutianiya, juuca na quiniuucua pueyaracaanu. Cuniqi, majaari quenaaja niucua niishishaanu quiniutianiya. ²⁶ Jiyajinia quijiaca pueyari socua na panishano casami patootanutianiya cuno tiacajiniara. Cuno tiacaari jiyanoehua nojori timitiasano quiniutianiya. ²⁷ Saniniuujia, maja cutaraari

sesa casaa tiuquinishaanu quiniutianiya cuno tiacajinia. Naajuhuj, majaari sesa miijiaca tiuquiniu quiniutianiya tii, sapojonuujucanio. Saaja noo pojori cutaraari tii tiuquitianutianiya canapue sesacate pueyaracaanu rishijiacarano Borrego Niquiojua naajioneejinia naajiotasano quiyacuajani.

22

¹ Na nuhuaji, Pueyaso seruuri cua niquitirii pueya samiitianijiotaja moo, cohuajanacu tojetaarucujanaa. Nenecuariquiaari. Cuno mohuacaari Jiyaniijia Pueyaso cajituijini pacartariquiaa, tee Borrego Niquiojua cajiyajaaniuhuj. ² Samiitianijia naanaari tiaca nuu jiuujiaaco nujuaturiquiaa, cuno moo shuriuquiocojuhuaj, niqijiria, na taqijirianio. Cuno naanaari puetunu racarajanaa metujuaca. Naacuajitij, puetunu marijijarajanaa, doce caminiujiya metunuuri. Na mועcacaari maninia, puetunu jiyacajinia quijiaca pueyajanaa naarajotajara. ³ Cuniqii, majaari socua Pueyaso sesacasano casaa quiniu quiniutianiya. Naacuajitij, Pueyasojuanaa, Borrego Niquiojuajuhuj, nojoricuajajari cuno tiacajinia quijiaca quiniutianiya, Jiyaniijijajanaa cajituu quiniucua tii. Nojori tojitajacaari nojori timitianutianiya pueyaracaanu tii. ⁴ Nojoriiri Pueyaso jiquioco shootiaca quiniutianiya. Na sesaari nojori jiniji naajiotasano quiniutianiya. ⁵ Cuniqii, majaari niucua niishishaanu quiniutianiya. Tii quijiaca pueyari maja na paniniu quiniutianiya samaritiu, pananunio. Jiyaniijia Pueyasojuanaacuajajari nojori cuhuatanutianiya. Nojoriiri jiyaniijanucua quiniutianiyajuhuj, puetunu Pueyaso shipinishanojuanaa nojori jitianura pueyaracaanura.

Jesucristo quera tiuquihua

⁶ Na nuhuaji, Pueyaso seruuri cua sequeree:

—Cua niquitishano quiajaniani, cua sequesanojuhuaj, puetunu cunojuanaari seetanujuanaa. Puetunujuanaari

tohuateeriquiano. Pueyasoori na Sohuanuta niishitiquiaa na sequesano caminiujiuniaa pueya, nojori pohuatanura pueya niquiara na niishitiniu panishano. Naajuhuj, nojuacuajaari quiaritia na seru jiyaroree, na tojtiajaca na niishitiniuria taa quiari naataja nojuaja tucuanutaniya puetunu na sequesanojuanaani. ⁷ Pa Jiyaniijiacuajaari naa sequeya: “Janiya quera tiuquiuhua niaacuani”. Shuquiriaatia quijiaca cutaraari noo pojori, canapuate nio naajioneejinia Pueyasojiniji niishitishano tojjiacani.

⁸ Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niquinu nuhua-jitij, cua tojinu nuhuajjiuhuj, janiyari Pueyaso seru pajama mojoquetareeni. Janiyari naa mojoquetaree nojuaja cua timitianura juucuanu, juhua Pueyaso. ⁹ Nojuajaari cua sequequee saaja:

—¡Maja naa miiniu pueyanonaa! Janiyari Pueyaso serujuhuaj, juhua quiajanijuhuj, juhua puetunu cuarta Pueyaso sequesano caminiujiuniaa pueyajuhuj. Naajuhuj, nio naajioneejinia naajiotasano tojjiaca pueyani, nojoriiri cuarta Pueyaso seyajuhuj. ¡Pueyasojanaa quia timitiare cutara!

¹⁰ Cua sequerejaariuhuj:

—Pueyaso niishitishano nio naajioneejinia quia naajiotasanoni, cunoori maja saa quiaraja. Puetunu pueyajanaa cuaara na niishiirianoj. Puetunu niya naajiotasanocua-jaari quera tohuateya. ¹¹ Naacuajitij, canapuate sesa na miiniu tarinitianu paniyaquiiani, sacuaraatia miijiojuacajuhuj, cuaara na tarinitiaaquiiriaqui. Saniniuujia, canapuate maninia miijiojuaca cutarani, saaja Pueyasora poonijionuujuacajuhuj, nojori cuaara tarinitiaaquiiria maninia nojori miiniujiuhuj.

¹² Pa Jiyaniijiacuajaari naa pa sequeya:

—¡Taaquiririnij! ¡Quera tiuquiuhuanijia! Janiyari cua tojtiajaca cua niqutiojosocoriquiano casaa tiuquitianu-

taniuhuani. Janiyari puetunu nojorijianaa nareja niquitiojonutaniyani, maninia nojori miiniuucua quiria, nojori miishano jaara maninia quiri. ¹³ Pueyaso Rupaa cua quiniuucua, janiyari puetunu Pueyaso sequenu panishanojuaanaa caminiuujiani. Janiyari quijiajuhuanani. Majaari cua supueni quiquiaari. Janiyari puetunu casaajanaa coretanijiani, na shaajariquianojuhuaj.

¹⁴ 'Shuquiriaatia quijiaca cutaraari noo pojori, canapete juhuacarjia nojori jiuujia jeequecanu Borrego Niquiojua nanacatani. Nojoriiri juhua cohuajaque toqueyaraca quiniutianiya cua niquiara. Naacuajitij, nojoriiri tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji. ¹⁵ Saniniuujia, nio pojoriiri Pueyaso tiaca mataca tamajiria jateenutaniya: sacuaraatia casaa miijica, shimiacuri, na camishoo maajipohua numuetucunujuaca, narta pueya puecoojuaca, shipinijosano casaacuara jacamatujuaca juhua Pueyasoochuara, cuaracashijionu porocua pueyano.

¹⁶ Janiyacuajaari cua seru jiyarorucuaa quiocuani, na niishitiniuria quijaniya puetunu niya quia naajiotasanojuanaa, saniniuujia Pueyaso pueya maapue niquiara na caminiuujishaanura. Janiyacuajaari Jesuni, supuetana David niquiohuacuajinio caneno pueyajinijinio supueno, Jiyaniijajanaa cua quiniuria David niti. Naajuhuj, Pueyaso Niyanu cua quiniuucua, janiyari noo rijiani, joojeatej, taa janiyajiniji naajiotasano quiya tariucuacaanu Pueyaso Rupaajiniacuajani.

¹⁷ Pueyaso Sohuanuuri Borrego Niquiojua niquioranota naa sequetiuya: "¡Miji Jiyaniijianaa!" Canapete naa nio naajioneejinia naajiotasano tojiyani, nojori cuara naa sequeerajuhuj: "¡Miji!" Cante jiyamueyani, nojori cuara niiria, Pueyaso samiitianijiotaja mohuacajiniji nojori ratunura. Na ratunaa pueyari, maja na ratunu sami

na cumaneeca mashiniquishaanu.

¹⁸ Cante nio naajioneerjinia juhuacarijia Pueyaso ni-
ishitishano tojiriini, taa Pueyaso miiniutianiyani, janiya-
janaari nia numooteyani, majaari quenaaja na po-
huatasano nia jataniniu. Cante niya pohuatasano
maateya socuani, Pueyasoori na saniitionutaniya nio naa-
jioneerjinia na pohuatasano naquiya na miitiaja casaata.

¹⁹ Naajuhuj, cante nio naajioneerjinia pohuatasano cuara-
cashitijiani, Pueyasoori cuno pueyano taanuunutaniya,
maja na quijia tiacajinia na tiuquiniuria. Naacujitij, ma-
jaari nojori mioonu quiniutianiya cuno tiacajinia naana
jajau, pueyaracaanu rishijiaca nojori quiniuria, taa nio
naajioneerjinia na pohuatashiyacuajani.

²⁰ Cante nio sequeyacuajani, nojuajaari naa sequeya:
“Taaquiriirinij, quera tiuquihuanijia”.

Jaa, Jiyaniijia Jesunaa. ¡Naacuaaquiniatejaj! ¡Ritia quia
nimiohua canaacua!

²¹ Pa Jiyaniijia Jesu cuaara puetunu nijaniyajanaa
cumaquiria na Sohuanuta.

Quiarinio pueyaso rupaa pa jiyaniijia Jesucristojiniji
pueyano rupaajinia

New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21
